


# خاطبات بدرجة سنتجیل

محمود بکری



محمود بكري

# خاطب بدرجة سنجل

دار المصري للنشر والتوزيع

## مقدمة

اللي بين إيديك دلوقتي ده، مش رواية، ولا كتاب، ولو جينا للحق، ده مش أي حاجة ممكن تتحط تحت قائمة (عمل أدبي).

يعني لو إنت هتشتري الكتاب ده عشان بتحب الأدب، وعايز تستفيد أدبياً ولغوياً.. لو سمحت، سيب الكتاب، وخذ فلوسك تاني؛ عشان اللي بين إيديك ده مجرد فكرة شغلت بالي فترة كبيرة، فحببت أشاركها معاك، وأوضّحك وجهة نظري فيها، مش أكثر من كده..

يمكن وجهة نظري في الموضوع ما يكونش ليها أي لازمة، بس أنا دايمًا مُقتنع إن تفكير شخصين في موضوع واحد، أحسن بكثير من تفكير شخص واحد.. يمكن تلاقي بين السطور اللي جاية حاجة تفيدك أو تلمسك، والأهم إنها تبسطك..

الكاتب

اللهم اجعلني لها ريباً لا ينقطع.. واجعلها لي  
رفيقة لا تغادر دربي أبداً.

إهداء

لكل اللي قرّر يقرب.. فحارب الظروف،  
وقرب.

# قرار

تم تحميل هذا الكتاب من موقع متاجر الكتب

[www.sa7eraikutub.com](http://www.sa7eraikutub.com)

يا ديلة الخطوبة، عُقبالنا كُلنا  
ونبني طوية طوية، في عَشْر حُينا  
نتهنى بالخطوبة، ونقول، من قلبنا:  
«يا ديلة الخطوبة..»

على الرغم من إن كلام الأغنية مُبهج جدًّا، وبيعرّفك  
قد إيه الخطوبة شيء جميل، وإن الحياة عبارة عن عَشْر  
جميل يتّنيه مع شريك حياتك، لكني فعلاً قلبي اتقبض..  
أنا أخطب

وأنجوز وأجيب زيادي وبامبرزا! لا طبعًا، مفيش  
الكلام ده خالص.

أنا كدة زي الفل؛ عايش حياتي ومقضيها.

أموت وأعرف، المرتبطين أو المتجوزين دول  
مستحملين بعض إزاي!

ربنا يكون في عونهم الصراحة. كل أصحاب اللي  
انجوزوا، ندموا على الخطوة دي، بس الحاجة اللي دايمًا

بستغرب إنهم يقولونها؛ إن دي الغلطة الوحيدة اللي  
الكل يبقى عايز يغلطها، وعايزيني أغلطها زيمهم! أبدأ.  
ليه كل اللي يعرفني عايزني ألف حوالين نفسي بالارتباط  
والجواز؟!!

ليه كل أصحابي المتجوزين عايزيني أخش بقلب  
جامد على المرحلة دي؟!.. فيها إيه يعني جديد عن  
حياتي العادية؟!.. تقريبًا كده مفيش. بس هُنا يقولوا:  
«استقرار».

استقرار فين وإنت بتكون مسئول عن بني آدم عايش  
معاك في البيت؟! إنت ضهره

وستدّه وأمانه في الدنيا.. فين الاستقرار، وإنت مُضطّر  
تلبي طلبات المهانم، وولادها بعد كده، عشان إنت رب  
الأسرة؟!!

دائمًا يقولولي إن مفيش أحسن من إحساس إنك لما  
تروّح البيت تعبان، تلاقني حد مستنيك لما ترجع؛ عشان  
يظمن بيك و عليك .. يكون محضرك كل حاجة من  
أكل وشرب وليس ويكون كل منه راحتك.. راحتك



في كل حاجة.

طب مانا أمي بشعمل معايا كده.. قبل ما أتحرك من الشغل، بتصل عليها أعرف هي عاملة أكل إيه؛ لو بحبه، أخليها تجهز لغاية ما أوصل، ولو مبحبوش، أشتري معايا أكل بحبه، وناكله؛ أنا و هي سواء، ونرمي الأكل اللي هي عملته.

عادي بعني..

آه صح، نسيت أقولكم حاجة، أنا عايش أنا وأمي لوحدنا في البيت، ماليش غيرها

وماهاش غيري.. بس الحاجة اللي بترعيني دايماً؛ هو أنا هعمل إيه من غيرها؟! أو بعدها؟!

دايماً نقول عايزة أفرح ببيك قبل ما أموت. ولما أزعل من الكلمة اللي بتقبض قلبي، كانت نقول جملة دايماً في بالي: «كلنا أموات ولاد أموات يا بني».

بس أنا دايماً عارف إنها مش هتموت وهتفضل عايشة فياً.

فعدت مع صاحبي ع القهوة من فترة، و كنا لسة

راجعين من خطوبة واحد صاحبنا، و بدأ يتكلم معاها، و  
شكل كلامه كان جَدَّ أوي.

هو: «أنا قرَّرت أخطب»

أنا: «بس يلا»

هو: «و الله يتكلم بجدا، أنا خلاص قرَّرت»

أنا: «والكلام ده من إمتي؟»

هو: «من بعد ما شوفت بنت عم العروسة بترقص،  
بجد شدتني من أول واحدة و نص!»

أنا: «و إنت قرَّرت تتجوز فجأة بعد ما شوفت صافينار  
هانم بترقص؟! طب ما تنقل شوية فيمكن

في الفرحة تظهر واحدة بترقص أحسن منها، وساعتها  
تندم!»

هو: «لا، أنا قرَّرت خلاص»

أنا كنت فأكره بيهزر، بس للأسف، طلع بيتكلم بجدا.  
و كلَّم صاحبنا، و عرف عن البنت كل حاجة، و أنا  
دلوفني في خطوبته. و بكده مفاضلش غيري في الشلة

من الولاد و البنات اللي متجوّزش أو خطب، أو حتى  
ارتبط.. وتقريبًا كده أنا بقيت خطر.

وسط الهيصمة الموجودة حواليتي، وأنا مبفكرش غير في  
حاجة واحدة بس؛ أنا ليه هخطب؟!

إيه اللي ناقصني في حياتي عشان أقرر القرار ده أنا  
كمان؟!

طب أصحابي اللي فيهم داق أكل فلانة، قراح خطبها؛  
عشان شايف إنها هتكون بست بيت هايلة، وصاحبنا ده  
اللي اتشدّ للبت من وسطها. أنا محتاج إيه؟!

عدّى الوقت في الخطوبة مَوّا، من غير ما أحس بيه،  
باركت لصاحبي ع الجريمة اللي هيعملها في نفسه وفي  
البشرية باللي بيحصل ده.

وأنا لسة بفكر محتاج إيه!

حضن.

أنا محتاج حضن. بس الحمد لله، ربنا ينجّلني أمي؛ كل أمّا  
أكون محتاج أتحضن، بروحها تحضّني. بس أمي هتمشي  
في يوم من الأيام، وأنا لازم يكون ليّا حدّ يحضّني.. مش

عايز حاجة غير الحفص، طب اشترى ديدوب كبير كده،  
و ابقى احضنه لما اعوز انحصن؟!

صح، انا محضنه.. بس مين هيحضني ويطبطب عليا  
ويلعب في شعري؟! بس انا لغاية دلوقتي محدش شدني  
خالص، ولا حسيته إنه يفتح يحضني، غير امي..  
انا اصلا اللي عمري ما فكرت ابص حواليا، واشوف  
مين يفتح بكون شريك حياتي.

هفكر كويس، واشوف مين يفتح يشاركني حياتي دي.  
ياتري فيه حد ممكن يقبلني اصلا؟! امي شايفاني احسن  
حد في الدنيا.. «القردي عين امه غزال»!

اتصلت بواحدة صاحبتني، من اللي معايا في الشغل؛  
عشان اسألها بجد بقي في كل حاجة، وافهم منها بقي انا  
داخل على ايه، يمكن تقبدي؛ بكونها انشي..

هي: «عايز ايه بابني؟!»

انا: «انزلي اعزيمك على شاور ما.. عايزك في موضوع»

هي: «خمس دقائق واكون عندك»

انا: «ابومس ايديك، الخمس دقائق دول ميقوش أكثر

من ربيع ساعة!

هي: «عيب عليك!»

بعد كلمة «عيب عليك» دي، يكون متأكد من اللي  
هيحصل، ومن الوقت اللي ممكن استناه.. الكلمة دي  
زي كلمة «ما تفلش».. لازم أقلق على طول بعدها.

قعدنا في مكان بحب أقعد فيه دايمًا، و سألتها:

أنا: «إنتي كائني، إيه الصفات اللي عايزاها في شريك  
حياتك؟»

المشكلة هنا إن بدأت عينيها تلمع، وأنا أكثر حاجة  
بخاف منها؛ إني أتفهم غلط.. وهي آخر واحدة ممكن  
أرتبط بيها.. عمري ما شوقتها غير أختي، لا مينفعش،  
جسمي قشعر بمجرد إني تخيلت أصلًا إنها تكون مراتي  
أوفي حضني.

هي: «إنه يكون وسيم، ويُعتَمَد عليه، ويشدني ليه  
بحركات مجنونة؛ زي إنه يكلمني بقولي

انزلي أعزمك على شاور ما!»

اللي عملت حساب له لاقته!

أنا: «بُصِّي يا ماما، قُومي رُوحي، وهانِ ساندوتش  
الشاورما ده!»

هي: «يا عم بهزُر معاك.. بص، إنت شكلك قررت  
تتجوز وتلحق أصحابنا البعدا»

أنا: «لا طبعا.. مستحيل»

هي: «لا يا بني، دي سُنَّة الحياة.. بس نصيحة؛ لو  
هتختار حد تكمل حياتك معاه، لازم يكون

هيستحملك زي ما إنت، ومنحاولش تنجمل قدامه،

خليك زي ما إنت، ولو قيلك بالشكل ده، كمل معاه»

سكتت لوقت كثير.. لغاية ما هي خلصت أكل.

أنا: «أنا قررت أخطب»

# رَدُّ فَعْلٍ

تم تحميل هذا الكتاب من موقع ساحة الكتب

[www.sa7eraikutub.com](http://www.sa7eraikutub.com)

تقريبًا كان القرار ده أخطر من قرار أخنس أدبي ولا  
علمي في الثانوية العامة.. وعلى الرغم من إني كنت  
بحب مواد الأدبي جدًا، لكني للأسف دخلت علمي،  
وللأسف أكثر بقيت دكتور.. والموضوع ده مرهق جدًا.  
دائمًا مفتتح بالحكمة اللي بتقول: «حب ما تعمل، تعمل  
ما تحب»

ولا بعمل اللي يحبه ولا بحب اللي بعمله، بس الحمد  
انصلت بشلة المقاطيع أصحابي، وانفقنا كلنا نتقابل  
بعد الشغل؛ عشان عايز أشاركهم قراري، وأشوف  
هيساعدوني إزاي في الموضوع ده.

اللي متأكدت، إنهم أكيد هيفرحوا فنيًا جدًا، مش بيازني  
ما هو المقروض يكون.. بس دول أصحابي، وسبقوني في  
موضوع الجواز ده، ولازم أستشيرهم برضه.

وعشان أنا اللي محتاجهم، وبالمرة كنا أول الشهر،  
اضطريت أعزمهم؛ عشان أنا الوحيد اللي معنديش



زوجة وولاد، وهو فرّ لمن يعني ١٢ (ده من وجهة نظرهم).

أنا بصراحة خائف أبدأ بالكلام، أو أعرفهم أنا بفكر في إيه؛ لأنني كنت أول واحد بيترق عليهم لما أعرف إن حد فيهم قرّر يخطّب.. وكل ما أتصل بيهم، أفضل أذلّ فيهم؛ بسبب إنهم مش عارفين بخرجوا براحتهم، وكنت أفرّج عليهم الشارع لما يشترّوا بامبرز وزبادي في آخر القعدة عشان خلاص مروّحين.

الفكرة كلها كانت فيّأ أنا قبل ماتكون فيهم؛ يعني أنا فعلاً محتاج أرتبط وأتجوّز، ولا أفضل زيّ ما أنا وأتغلب على أيّ إحساس بالرغبة أو الاحتياج اللي ممكن يروح مع الوقت.

بس دايماً متأكد، إن طالما بدأت تفكر في الحاجة، يبقى أنت محتاجها، طول ما هي بعيدة عنك، إنت مش محتاجها ولا بتفكر فيها، يمكن إلحاح والديّ عليّأ في الموضوع ده، ليه دخل في القرار.. أكيد، المهم يعني إن خلاص نويت، والنية لله، إني أخطب.

أنا: «أنا قررت أخطب»

الجملة دي كانت كفيلة توقعهم كلهم على الأرض من الضحك.. طبعي لما أقول كده - وهنأ عارفين رأيي كويس في الموضوع ده- لازم بضحكوا، لما يفتكروا كلامي على كل واحد فيهم، بعد ما خطب، وانجوز، لازم يعملوا أكثر من كده.

صاحبي: «استعيذ بالله من الشيطان الرجيم يا بني..  
إيه اللي بتفوله ده!؟»

عل الرغم من إنه متجوز، بس كان كلامه بجد، ميهزرس.. الجملة دي خلّتي أعيد تفكير في ثواني في كل اللي شغل بالي الفترة اللي قاتت.

إيه اللي بخلي حد متجوز، والإنسانة دي بيحبها، يقول كده!؟

ياترى مش مبسوط في حياته!؟ طب إيه الضغوظات اللي تخليه يقول كده!؟

طول الوقت كان يقولي: «عايز أفرح فيك، ومش هسكت إلا لما أجوزك بنفسي»، ولما لقي الموضوع بجد،

أنا: «بتكلمم بجد.. أنا فعلاً قررت أخطب.. ومهدا  
أدور على عروسة»

صاحبي: «الجواز مش بوس وأحضان وبس؛ الجواز  
مستولية كبيرة، لو مش هتكون أدها،

هتتعب في حياتك.. لازم تبقي مفكر كويس جداً في  
كل خطوة بتعملها. لو الإنسانة

اللي هتشاركك حياتك متفاهمة وناضجة، ده بيقلل من  
نسبة فشل العلاقة.. بس لازم

تكون إنت، في المقام الأول، أد المستولية؛ عقلياً  
ومادياً.. ومش هكون بكذب عليك،

لو قولتلك دلوقتي لازم تكون قادر على المستولية  
المادية أكثر»

صاحبي بيتكلم صح.. إحنا في مجتمع شرقي، مهنما  
السُّتات طالبوا بحقوق المرأة، بس فيه حاجات تلافية  
السُّت فيها فجأة، رغم كل محاولاتها للمساواة، تقوله:  
«أصل أنا ست»، «أنا مستولة منك»، «إنت الراجل»..

طب ما هو حضورك، ليل نهار، بتمني نكوي راجل  
والله.

عارف إن المضايقات اللي بتعرض لها الأثنى في مجتمعتنا  
كبيرة، بس لازم نعرف إن الراجل راجل، والتت..  
يت.

أنا: «ما هو أنا لازم أتجوز.. هو أنا هكمل حياتي زومبي  
لو حدي كده ١٩؟ وطالماده شر لا بُد مِنه،

يبقى أنا أخش عليه بنفسي؛ عشان أتفي المصاعب اللي  
فيه، وأحاول أحولها من شر، زِي

ما أنا شايفه، وإنتم بتصورو قولي طول الوقت، لحاجة  
حلوة.. أبتعم حاجة حلوة فيها

شوية خلافات ومشاكل، بس حاجة حلوة»

صاحبي: «إزاي يعني يا فالح ١٩؟»

أنا: «بُص، التت عامة بتحب كلمة حاضر أوي، فوق  
مما تتخيل.. ويعدين مفيش مانع من بعض

التنازلات يعني، مش لازم كل اللي إنت عابزه يكون..

أومال هي شريكك في كل حاجة ليه؟

عارف ليه لازم تفكر فيها بالشكل ده، وإلها المفروض  
تكون أول - وأهم - شخص في حياتك

وعادي من غير أي مشاكل ممكن تتنازل عن حاجات  
معينة عشانها؟ عشان هي الشكن..

هي اللي بتحتويك وتقدرَك.. وبها إنكم متجوزين،  
فاهمين المعنى الحرفي لكلمة احتواء»

صاحبي: «عندك حق.. يكفي والله يا بني إنك بتروح  
ترمي كل حولك وهمومك في حضنها..

عارف إحساس إنك تبقى جوّه حد.. ضمك ومكّيش  
فيك كده، ده لوحده بخليني أتنازل

عن حاجات كثير أوي.. بس يمكن الظروف المادية  
للبلد كُله هي سبب المشاكل دي

كُله. بس عارف، لولا الاجتهاد والسعي إنك تحاول  
تبقى شخص ناجح مكفي نفسك

وبيتك، مكانتش اللذة هنا.. اللذة في الرحلة مش في

الوصول.. كُلُّنا بتحاول ببقى

مرنا حين مادبنا.. لو بقينا كده، ببقى وصلنا، وهنا نفقد  
لذة المحاولة. بص، هو كلام

مالوش علاقة بالموضوع، بس بجد إنت كده محتاج  
نفكر كويس؛ عشان تعرف

تعمل إيه. مبروك

بعد الكلام اللي الكل تقريبًا كان عارفه، بس كله  
مغمض عينيه عنه، اتحوّلت القعدة؛ من السخرية عليًا،  
وعلى قراري، لتشجيع ليًا على الخطوة دي، وأذّ إليه  
الجواز استقرار، وشوية حاجات كدة حلوة، بتخليك  
تقدر تكمل يومك وحياتك كلها. كُلُّهم اتفقوا على  
حاجة، أنا للغاية دلوقتي مش عارف أعملها.. إني لازم  
أكمل حياتي مع حد أحب وبيحبي.. وأنا مفيش في حياتي  
حد.. بس لازم الأفي، واللي يسأل، مينوهش.

كان الطيبي بعد كلامي مع أصحابي، إني أفرّح أُمي  
بالخبر ده.. وعشان محدش يعرفها أدّي، وعشان عارف  
هي بترسوم لإيه من زمان، كان لازم أقول الخبر في وقت

مُعِينٌ، بطريقة مُعَيَّنَةٍ، عشان أضمن رَدَّ فعل طبيعي من أم لابنها، مش من صاحبة لصاحبها، أمي صاحبتني بشكل مخيف، لدرجة إنها بتغير عليًا من أصحاب أصلاً، لاني بقعد معاهم أكثر ما بقعد معاها.

كان الحل، إني في يوم من أيام الأجازة الصبح، أصحى بدري، وأبس المريلة، وأعمل فيها ميت بيت شاطرة، وأعمل فطار أهبل كده، على أدِّي أنا وهي، وأروح بالأكل ليها في السرير وأكلها زَي بتي.. وقد كان، قشّرت البطاطس، وحطيت الزيت على النار، ولپست الحوذة، ورميت البطاطس في الزيت، وجريت وخذت نفس، ورجعت أقلب البطاطس لغاية ما اتحمّرت، عملت بيض ومرّي وجبنة وكوباية عصير مانجة، وروحت لغاية السرير صحّيتها، وحطيت الصينية على رجليها، وقعدنا ناكل.

بعيدًا عن نظرتها المريبة ليًا؛ لأنها أكيد فهمت إني يا إما عامل مصيبة وجاي أعترف لها، يا إما جاي آخذ منها الإذن على إني أعمل مصيبة.. وفي الحالتين، هيكون فيه نقاش طويل، يبدأ بفطار لذيذ زَي ده.

أمي: «عايز إيه؟»

السؤال جه مباشر، بشكل أنا مكنتش متوقّعه، بس كان لازم يكون فيه إجابة سريعة، قاتلة لكل الشكوك، اللي بتدور جوه دماغ أمي دلوقتي.

أنا: «قررت أنجوز»

(صمت).

بصّيتها بتركيز أوي في عينيها، لدرجة إنّي شوفت فيهم حيرة مش فاهم سببها.. عينيها اتملت دموع، ومبقتش عارف أعمل إيه!

عايز أقولها بهزر، وألغي الموضوع من دماغي، بس لا، أكيد هي فرحانة ليّا.. بس إيه اللي أنا شايفه ده؟

أمي: «عايز تسييني!»

أنا: «والله ما أقدر يا بست الكُل.. ده أنا عايز أفرك بيّا، ويا بستّي هقعّد معاكي هنا والله، مش هروح في جنة يعني.. لو مش عايزاني أقعد في شقتي اللي فوق، هقعّد معاكي..»

«إيه رأيك؟»



أمي: «ومين بنت اللدينة اللي وقَّعتك بعد كل الوقت ده؟ أنا مش بتحابل عليك بقالي سنين عشان أجوزك وأفرح بيك، وانت اللي رافض؟!»  
أنا: «لا، ماهو مفيش حد وقَّعتني»  
(صمت).

أنا: «فكَّرت كوبس، واكتشفت إني لازم أفرحك بيًا بقى يا ماما.. وتشيلي عيالي كده»

أمي: «بُص يا بني، أنا لو عليًا مجوزكش أبدًا، ولا أخلي واحدة تاخذك مِنِّي.. بس آهي سُنَّة الحياة .. قوم بقى اغسل الأطباق دي ورجعها مكانها»

أنا: «هنهزَّر بقى! أنا عملت الفطار، وانتي اغسلي الأطباق!»

أمي حاولت تهزَّر؛ عشان تغلب دموعها، بس مقديرتش .. عيَّطت مِن فرحتها، خدتنى فى حضنها، وباركتلى، وقالتلى: «عروستك عندي».

وإدي آخر حاجة كنت مُتوقِّعها فى حياتي؛ إني أتجوز بالطريقة دي.. أنا عندي أتشدُّ لواحدة بتعمل أي حاجة، فى أي حنة، أرحم مِن إني أقعد كده وأمى تفضل تعد

ليأه إيه رايبك في فلاتة وعلانة وودي طويلة وودي قصيرة  
الموضوع مش «فير» بالنسبالي.. أنا لازم أختار، ولازم  
أنتد للإنسانة اللي هكمل معاها حياتي.. وبالعافية،  
أقنعت أمي؛ إن الموضوع ده سيبه عليا.. أنا متصرف .

أمي: «يعني هتزل كارفور تشتري عروسة وتوجع؟!»  
إتوكس وسييني أجوزك بقى»

أنا: «بُصي يا ماما، أنا أكبر وكسة كانت في حياتي؛ إن  
أبني دكتور، وده عشان بحبك والله..»

سييني بقى أختار الوكسة دي بمزاج، عشان دي  
هتبقى تأييدة.. ولازم أختار اللي هيقى معايا المدة دي  
كلها براحتي»

كل ما الوقت بعددي عليا، أعرف إنى داخل عل أخطر  
قرار في حياتي.. إنت فجأة بتقرر إنك نجيب حد، مهما  
كان الحد ده مين، أو هتجبه قد إيه، إنه يشاركك كل  
حاجة.. يكفي إنه هيكون من حقة بشوقك، زي ما أنت،  
بكل تفاصيلك.. هتقف قدامه زي ما اتولدت بالظبط..  
عشان يشبع منك وتشبع منه.. الموضوع ده مخيف جدًا..  
عشان كدة لازم تختار -صح أوي- الإنسان اللي هتكمل

معاه.. اللي هيقاسمك أكلك وشربك وتومك، ويومك  
كمان.. كل حاجة في حياتك خلاص هتتقسّم على اثنين،  
وهتقبل تُميزاته، قبل عيوبه؛ لأنك بتجبه.

بس أنا مفيش حد في حياتي، ومعمل إيه صح؟! اسمع  
كلام أمي وأنزل كارفور! ولا أعمل إيه؟! طول عمري  
مَسحول في الدراسة، وبعدها الشغل، ومكانش عندي  
وقت إني أبص حواليا كويس، حتى زمايلي في الشغل،  
تحسُّهم رجالة من كتر ما الشغل بتاعنا مُرهق ومُتعب،  
وفكرة إني أشقط عروسة من أي فرح، يُخص حد أعرسه،  
دي مستحيله. الحل إيه؟

بعيدًا عن إني هتصرف إزاي في الموضوع ده، بس أنا  
مبسوط إني عرّفت الناس اللي حواليا إن خلاص ربنا  
هداني، وإني نويت أكمل نص ديني، وإني اطّعت  
لرد فعلهم.. أنا خلاص نويت أبقى عريس، وده مش  
إنجاز، دي حاجة طبيعية موجودة من بداية الخلق.. بس  
أنا اللي كنت مأجلها شوية؛ لغاية ما الاحتياج يهجم على  
حياتي فجأة كده، لدرجة إني حاسس إنه هيقتلني.

# الفريك

ج

رهبة الخطورة مسيطرة عليًا.. عامل فيها قريبك بقى،  
ومش محتاج شريك.. من يوم ما أخذت القرار وأنا بأجله  
كل يوم.. بأجل أبدا أبص حواليا كويس؛ يمكن أخذ  
بالي من أي حد، أو أخذ بالي من اللي واخذ باله مني..  
كل يوم بأجل كل حاجة؛ بدافع الرهبة.. متهيألي رهبة  
الحياة الجديدة بتكون متائلة عند الولد والبنت، يعني  
مش البنت بس اللي بتكون خائفة من الحياة الجديدة  
والبيت الجديد مع شريك حياتها.

أنا كمان خايف.. خايف أندم إنى أخذت الخطورة دي،  
وإنى مكونش مبسوط في حياتي مع حد، وإن الأفضل إنى  
أبقى لوحدي.. بس دايمًا أسمع إن مهبها كانت الوحدة  
حلوة، الحياة المشتركة أحلى بكثير. مش وقته طبعًا  
الكلام ده.. أنا لازم أدور على عروسة.. كويسة ومناسبة  
ليًا.. أقدر أشاركها حياتي، وأبقى قدامها زي ما أنا، أقدر

أكون قدامها بدون أي تصنع أو تجمل.

طب أنا شخص مبعرفش أبدأ كلام مع أي حد، وكل اللي أعرفهم، يا زمايل دراسة، يا زمايل شغل، وعمري ما حطيتهم في المكانة دي أبدأ، بحسُّهم كُلُّهم إخواني، أنا كده هفضل سنجل لغاية ما أموت بالشكل ده.. أدور إزاي؟

ممکن أبدأ أزور قرايبي مثلاً، وأشوف مين من قرايبي  
ممکن يكون مناسب ليا!

ممکن أبدأ في أي فرح، أركز مع البنات اللي نُصِّهم  
بيكون رايح يصطاد عريس!

بس أنا فاشل في الموضوع ده، ومش هعرف أعمل  
ده، ومش عايز أقع تحت مصيدة جواز الصالونات؛  
لأنني مش هقدر أعيش مع حد، لمجرد إنه حد كويس،  
ممکن جداً يكون كويس، بس مش مناسب، ممکن يكون  
مفيهوش أي عيوب بس مبيشدنيش.. أقرب الناس ليا  
دلوقتي عارفين بالقرار اللي أخذته، وطبعاً المصري  
معروف بكرمه، وكلُّه، بفضل الله، اعتبر إن الأمر يخصه

عل المستوى الشحصي، وبدأت ترشحات للجوار، وأنا  
بقيت في حيرة أكثر.. إزاي هتجوز بالشكل ده!

في وسط ما أنا غرقان في الشغل، وأنا في الشغل يشتغل  
وبس.. وصلتني رسالة من أمي، عايزاني أروح بدري  
النهاردة؛ عشان جالنا ضيوف.

الفار لعب في عبي، واناكدت، زي ما أنت اناكدت  
دلوقتي، إنها عازمة حد من قرايينا، ومعاهم بنت في سن  
جواز؛ عشان أشوفها وآنكلم معاها بدافع إننا قرايب  
وكدة.

أخاف أظلم حد معايا.. الظلم وِجش.. حاولت أقنع  
أمي إني عندي شغل ومش هعرف آجي، وأهرب من  
المحاولة دي، لكن هي صممت تعمل ده.

خلصت شغلي، وقولت آخذ معايا حاجة حلوة؛ بيا  
إن فيه عروسة في البيت.. وحصل اللي مكنتش متوقَّعه  
أصلاً.. كل اللي في البيت، بيت كبيرة، من دور أمي..  
استغربت! قلت يمكن العروسة بتعمل حاجة هنا ولا  
هنا.. أو أمي زَنَقَتْها في المطبخ عشان تأكلني من أيديها؛

عشان مثلاً أقرب طريق لقلب الراجل كرشه.

سَلَمْتُ عَلَى الضَّيْفَةِ، وَأُمِّي قَامَتْ، وَبِحَرَكَةِ غَيْرِ  
مُتَوَقَّعَةٍ، عَدَلْتُ لِيَاقَةَ الْقَمِيصِ بَتَاعِي، وَقَالَتْ لَهَا:  
"شَوْفْتِي ابْنِي بَقِي عَرِيْسَ إِزَاي!"

إيه ده؟!

إيه الأُوْفَرُ ده يا ماما!

مفيش طريقة مباشرة ومُحَرَّجَةٌ أَكْثَرَ مِنْ كَدِهِ يَا حَاجَّةَ!  
طَبَعًا الْكَلَامُ دَه فِي سَرِي.. ابْتَسَمَتْ، وَقَعَدَتْ مَكْسُوفٍ  
فَعَلًا مِنَ الْحَرَكَةِ.. بَاصِصَ عَلَى الْمَطْبِخِ، مَسْتَنِي الْبِنْتِ  
تَطْلَعُ مِنْ جُوهٍ.. فَجَاءَتْ! أُمِّي طَلَّعَتْ صُورَ مِنْ جَيْبِهَا،  
وَبِتَقُولِي: «بُصُّ كَدِهِ».

صَدَمْتَنِي الطَّرِيقَةُ.. عَلَى أَذْمَا كُنْتُ مَفْكَرَ إِذَا تَحَلَّى حَدْ  
يَزُورُنَا دِي قَدِيمَةَ أُوَي، بَسْ مَوْضُوعَ الصُّورِ دَه مَكْتَشِ  
مُتَوَقَّعُهُ.. بَصَّيْتُ لِأُمِّي، مَشْ مَصْدُقٌ، قَالَتِي: «بُصُّ يَا  
حَبِيبِي وَاخْتَارِ». الْمَوْضُوعُ دَه، مُهَيِّنٌ جَدًّا، لِلبِنَاتِ الِّي فِي  
الصُّورِ.. إِزَايِ مَمْكَنٌ أَعْمَلُ دَه.. مَشْ هَيَنْفَعُ.. بَصَّيْتُ؛  
عِشَانِ أَرْضِي فِضُولِ أُمِّي، بَسْ عِشَانِ مِتْرَعْلَشْ، وَبَعْدَ



محاولات إقناع، منها، ومن الضيفة، مقتنعش برُصه.  
السُّت مشيت، وقالت لأمي إنها هتجيب صور تانية،  
يمكن أقتنع المرة الجايّة.

حاولت أقنع أمي، إن اللي بيحصل ده عيب  
ومبصحش، قالتلي لا، هو ده اللي ينفع.. هو ده اللي  
هيجليني أتجوز في أسرع وقت.

أمي: «أنا مش مستعدة أستنى سنة ولا اتنين؛ لغاية  
ماتيجي تقولي أنا لقيت عروسة!»

أنا: «لا يمكن هتجوز بالطريقة دي، وماتلقيش؛  
قريب أوي هقولك إن ربنا رزقني بنت الحلال،  
وهاأخذك من إيدك عشان أخطبها..»

اضايقت كثير من اللي حصل.. نزلت أقعد على القهوة  
اللي متعود أروحها مع أصحابي.. كلمتهم؛ بحيث أفك  
شوية من اللي حصل. وبعد مناوشات ومنازعات -مع  
مداماتهم- قدير (٢) منهم ينزلوا، والباقيين اتعمل عليهم  
حظر تجوال في البيت، ومنزلوش.

محبش أحكي عن اللي حصل.. حاولت أفك منه،

بس عشان أبقى تمام.. الي قاعدين من أقرب أصحابي..  
الكلام بدأ بشكل غير تقليدي بيننا.

صاحبي: «عملت إيه في موضوعك؟»

أنا: «والله لسنة..»

صاحبي: «مستني إيه؟ إيه الي معطلك يعني؟»

أنا: «هي عربية هروح أشتريها؟ ده جواز.. محتاج  
أعرف حد مناسب؛ عشان هو الي هيكمل معايا طول  
عمري..»

صاحبي: «يا بني كلهم بعد الجواز واحد.. فأنجز  
وخلص عايزين نفرح فيك، ونعمل معاك الواجب»

أنا: «آهو عشان الواجب ده، بفكر معملش فرح يا  
أوغاد!»

بدأ كل واحد يتكلم عن ذكرياته مع الفرع، والمواقف  
الطريفة الي حصلت فيه.. بقى كلامنا

في القعدة مُقتصر على الجواز وبس.

سألت سؤال مُلح عليًا فعلاً..

أنا: «الجواز حلو؟»

صاحبي: «البت زَيّ الشمس بالقطب.. ساعات  
نكون محتاجينها أوي؛ في برد الشتا، وساعات  
نكون مش طايقينها؛ في حر الصيف.. بس مانقدرش  
نستغني عنها؛ لأنها في

الحالتين بتنور لنا الحياة، ومهما وصلت التكنولوجيا في  
اختراعات، وإنك تقدر تنور  
العالم كله، محدش يقدر يستغني عن الشمس.. البنت  
هي الشمس.. البنت هي الحياة»

أنا: «ربنا يستر، والشمس دي مش تولع فينا كلنا»

فجأة صاحبي قلب خاطية، وقال فإكر فلانة، اللي  
شفتها في فرح فلان.. وقعد يفكرني أذيه كانت جامدة،  
ولافتة للنظر في الفرحة.. أنا ضحكت، قولتله:

«وانت متوقع إني هروح أخطب واحدة لغتت انتباهك  
يعني؟! إنت عيبط ولأيه يا عم؟! أنا طباعي صعبة  
جداً.. غيبور جدّاً؛ لدرجة إني خايف أصلاً لما أتجوز  
أخنق مراتي بغيرتي.. يعني إيه أكون عايز الحاجة دي ليا

وبس، وعاييز أقفل عليها؛ عشان محدش يشوفها غيري!  
إزاي بقى أوافق على إني أروح أتقدم لبنت لفتت انتباه  
حد؛ سواء قاصدة أو لأ؟!»

فِضِل يفكّرني بكُل البنات اللي في كل الأفراح اللي  
روحناها.. فِضِل يكلمني عن زمايلي في الشغل، وأنا  
مش قادر أقتنع بالطريقة دي.

للحظة، كان ممكن أضعف للفكرة دي؛ لأني فعلاً لو  
فِضِلت ١٠٠ سنة، مش هعرف الأقي حد يناسبني، أو  
أبدأ كلام مع حد.. أنا محتاج مُعجزة عشان الأقي حد  
يشدني، وعش بس كدة، لأ، وأقدر أروح أتكلم معاها؛  
أقوِّها: «لو سمحتي، أنا عاييز أتجوزك كده وش!»

حاولت أفهمهم إن الطريقة دي مش كويسة، ويمكن  
سبب مشاكلهم مع زوجاتهم؛ إنهم عرفوهم بالطريقة  
دي.. ومكانش فيه طريقة يعرفوا بيها بعض أكثر..  
مينفعش أعيش كدة وخلاص؛ لأن المفروض أعيش،  
وأتجوز وأخلف.. البشرية مش واقفة علياً يعني..  
معرفتش تعمل ده خالص.. منكِرش إني اتأثرت بطريقة  
تفكيرهم، وبدأت أسألهم عن بعض الأشخاص اللي

كانوا زمايلنا في الدراسة، بس للأسف كلهم انحزوا..  
الياس امتلكني ساعتها، وحتيت إني خلاص لازم  
أصرف نظر عن الموضوع ده.

مافيهاش حاجة يعني لو سبت نفسي للصدقة اللي تغير  
حياتي.. مش مهم هستنى أذإيه.. المهم إنها يوم ما تيجي،  
أكون قادر إني مضيعهاش من أيدي، والأهم، إني هكون  
مستني.

خلصنا، وحاسبنا، ومشينا.. وإحنا طالعين، كان فيه  
لمة في آخر الشارع، وتقريبًا خناقة! فقولنا نروح نتفرج،  
فلقينا واحد واقف في نص هدومه؛ بسبب ان فيه بنت  
فرجت الناس عليه ومصممة إنها توديه القسم، وتعمله  
محضر، فواحد من الناس الكبيرة يسأها:

«عمل إيه يا بنتي؟»

البنت: «عاكسني.. ولما طلبت منه يبطل، شتمني  
بأمي»

الراجل: «كلنا بتشيتيم كل يوم.. وعشان شتمك،  
تقومي تفرجي عليه الشارع وتعملي كل ده!؟»

أنا مش متخيل إزاي أصلاً جالها الجُرأة تقف؛ عشان  
تاخذ حقها كده.. مهيا كان، هي بنت.. المهم، سمعت  
من البنات اللي واقفين إنها رَوَّقْتُهُ خالص، وبعد مُحَايَلَات  
من الناس، سَابَتْهُ يمشي، والبنات كانوا مبسوطين منها  
جدًّا؛ لأنها تقريبًا جابتلهم حقهم، اللي بيضيع منهم كل  
يوم.

صَفْة

تم تحميل هذا الكتاب من مواقع سائر الكتب

[www.sa7erakutub.com](http://www.sa7erakutub.com)

أنا أسمع عن قصص الحب اللي تبدأ بنظرة، حادثة،  
أي حاجة.. إنها حد يُعجَب بنت؛ لمُجَرَّد إنها مسابتش  
حقها، وصمّيت تاخذه، مَهْمَا كَلَّفَهَا الموضوع.

البنت، تقريياً، خطفني الإصرار في عينيها.. إصرارها  
إنها تاخذ حقها بإيديها، في بلد مفيش حق بيرجع فيها؛  
خُصُوصًا إن كل اللي واقفين كانوا بيحاولوا يمشوا الواد  
من قُدَّامها.

سيطر عليّ بشكل كبير، وبصراحة، خُفت أرواح  
أكلّمها.. ومش عارف أعمل إيه!

هروح أقولها إيه؟! ها تخرج أكلمها، ولو تجرّأت  
أصلاً، هروح أقولها إيه! خاصة إن البنت شكلها مُؤدّبة  
جدًا، وماهاش في أي كلام.. شايفها قُدَّام عينيّا بتبعد،  
وأصحابي بيشدوني عشان أروح معاهم، بس مش قادر  
أبعد عيني من عليها، وهي كل ثانية بتبعد وبتختفي..  
اتحجّجت إني لازم أجيب حاجات للبيت، وسينتهم  
ومشيت.



مشيت وراها زي العبيط.. مش عارف ليه ولا عارف  
هعمل إيه! كنت بأخد قرار إني أوقفها وأسألها هي مين،  
أكثر من مرة، بس تراجععت لأنني مُتوقع رد فعلها..

مش قصدي رد الفعل العنيف خالص.. بس حاجة  
كده خلّتني أحس إنها مش هتقبل تتكلم معايا في  
الشارع، ولا حتى هترُد عليّ.. الموضوع بالنسبالي كان  
مُخيف.. ليه اتشدّيت أوي كدة!.. وإزاي ممكن تضيع  
مِنِّي في ثانية كده؟!!

طَلَعْتُ على الشارع الرئيسي ووقفت تاكسي. وأنا في  
اللحظة دي، حَقَقْتُ حلم كان نفسي أحققُه من زمان..  
إني أركب تاكسي وأقولُه اطلع ورا العريّة دي.. وفعلاً  
وقفت تاكسي، وقولتله: «اطلع ورا التاكسي ده، واوعى  
يهرب منك!». أنا برضه مش عارف؛ لما أعرف هي رايحة  
فين أو ساكنة فين، هستفيد إيه؟! هَجِيب مينين جُرْأَة إني  
أطلع وراها، أو أسأل عنها.. أنا حتى معرفش هي مين،  
ولا اسمها إيه ولا أي حاجة.. بس فكرة إنها تضيع مِنِّي،  
كانت مُخيفة جداً.. إيه الإحساس اللي جالي فجأة ده؟!  
معرفش.. ياترى فعلاً هي بنت تشدُّ وجدابة لدرجة اللي

بيحصل ده؟ ولا عشان أنا محتاج ده، ومقرّر ده، فأول بنت - في أول موقف - فكّرت فيها بالشكل ده؟!

السواقى يحاولش يقطع تركيزي مع العربية اللي قدامنا، وده غير متوقّع من سواقين التاكسي وفجأة، قالي بمُتهى الثقة: «الستات كلهم كده؛ الخيانة في طبعهم»، وطبعاً هنا أنا استنتجت هو تفكيره وصلّه ليفين، وردّيت عليه.

أنا: «لالالالا، مش اللي في دماغك خالص ياسطى.. العربية اللي قدامنا دي مفيهاش مراقي، وما بتخونيش خالص.. أنا يمكن شكلي طيب، أنا غلبان شويتين، بس أنا راجل أوي»

السواقى: «يبقى حد نصّب عليك.. قولي الحكاية وإحنا أول ما نوصل ندغدغ أمّه»

أنا: «ياسطى - الله يكرمك - الموضوع مش كده خالص والله»

السواقى: «أومال إيه يا هندسة؟!»

أنا: «عرفت مينين؟»

السواقى: «عرفت إيه؟»

أنا: «إني دكتور: D»

ضحك ضحكة شريرة، وقال: «باين عليك يا باشمهندس»، محسوبك برضه يفهم في البني آدميين.. سألني مين اللي في العربية ويتراقبه ليه.. كنت خايف أقوله الحقيقة الصراحة، بس اكتشفت إن الحقيقة أهون من أي حاجة هيستتجها.. أنا عندي يقول علياً مجنون، أحسن ما يفترض افتراضات تانية.

حكيتله اللي حصل بالتفصيل المبل .. بصلي من فوق لتحت، وقال: هتخطب وتجاوز واحدة متعرفهاش، ولا تعرف حاجة عن أهلها، لمجرد إنك شفتها بتخانق عشان تجيب حقها! يا بني قول كلام غير ده.. إنت لازم تسأل عليها، مش يمكن تكون متناسبكش.. مش يمكن أصلاً مخطوبة أو متجوزة.. فكرة إنك تروح وراها، وتطلع البيت وتقولهم أنا جاي أتقدم لبتكم دي، ممكن تأخذ فيها علاقة محترمة من جوزها، لو متجوزة.. إنت لازم تهدي وتساألني تعمل إيه.

كان الطبيعي إني أسأل النايغة طبعاً عشان ينصحني أعمل إيه.

بُصِرَ بَقِي يَا بَنِي، أَنَا مُتَجَوِّزٌ مِنْ زَمَانِ أَوْي، وَيَامَا  
سُنِفْتُ فِي طَبِيعِ السَّنَاتِ.. الْحَرَكَةُ بِنَاعَتِكَ دِي مَبْنَاكُلْش  
مَعَاهُمْ.. لِأَزْمِ الْأَوَّلِ تَلَفْتُ انْتِبَاهَهَا، وَبَعْدَ بَيْنِ تَكَلُّمِهَا،  
وَبَعْدَ كَدِّهِ تَرُوحُ تَتَقَدَّمُ.. إِنَّمَا تَرُوحُ خَبِطَ لُزُقِ كَدِّهِ.. طَبَّ  
بِصِفَتِكَ إِيه؟ هَتَعْتَبِرُكَ عَيْلِ بَيْنِ بِيَدُورِ عَلَى عَرُوسَةٍ،  
وَهَتَرَفُضُّكَ مِنَ الْبَابِ لِلطَّاقِ.. إِنْ تَسْأَلُ عَلَيْهَا،  
وَتَعْرِفُ هِيَّ كَامِ سَنَةٍ، بِنَدْرَسِ وَلَا شُغَالَةٍ، وَمَكَانِ شُغْلِهَا  
أَوْ دِرَاسَتِهَا فَيَنْ، الْمَهْمُ إِنَّكَ تَسْأَلُ عَلَيْهَا، وَبَعْدَ كَدِّهِ،  
تَشُوفُ هَتَعْمَلُ إِيه؟

الصرّاحة عجبتي دماغه، بس العربية وقفت فجأة،  
فمعرفةش أسأله هتعمل إيه، وقولت أبقى أعتمد على  
نفسِي بَقِي.. حَابِسْتِ وَتَزَلْتِ، وَالْبَيْتِ دَخَلْتَ عِمَارَةَ  
كَبِيرَةَ، وَالْحَمْدُ لِلَّهِ، كَانَ لِبِهَا بَوَابٌ.. بس أَنَا عَمِشُ عَارِفُ  
هَسْأَلُهُ إِزَايِ، أَوْ هَقُولُهُ إِيه.. هَتَكَلِّمُ مَعَاهُ بِصِفَتِي إِيه؟  
وَهَتُظْهِرُ لِي فِكْرَةَ مِنَ السَّمَاءِ؟ إِنْ أَرُوحُ أَسْأَلُهُ عَلَى شَقَّةِ  
فَاضِيَةِ، وَأَجْرَجِرُهُ فِي الْكَلَامِ، لِغَايَةِ مَا أَعْرِفُ هِيَّ مِينِ  
وَهَتُظْهِرُ فِيهَا إِيه.. وَفِعْلًا دَخَلْتُ عَلَيْهِ بِمُتَهَيِّ الشِّيَاكَةِ،  
وَسَأَلْتُهُ إِنْ كَانَ فِيهِ شَقَّةُ فَاضِيَةِ فِي الْعِمَارَةِ وَلَا لَا، وَكَانَتْ

الإجابة صاعقة.. إن فيه شقة فعلاً، وأصحابها سايين  
له حرية التصرف فيها، وإنه يأجرها لهم وهُما مش هنا،  
ومعاه المفتاح، وراسه وألف سيف أنفُرج عليها الأول،  
وبعدين تفاهم في موضوع السعر والتفاصيل دي.

كنت مآشي وراه في الشقة زي العبيط، وهو عمال  
يشرحلي مُميزات الشقة، وقد إيه إن قليل عليها السعر  
اللي معطوط فيها كإيجار، وأنا كل اللي شاغل تفكيري؛  
إني أسأله عن البنت اللي لسة طالعة قدامه.. معرفتش  
أفتح معاه الموضوع.. وأخيراً أخذت رقمه، وقلت له  
إني هكلمُه بكرة عشان أتفق معاه.. نزلت ومشيت  
بيطء جنب البيت، لغاية ما نادى على عيبل من عياله؛  
عشان يشتري له علبه سجابر من الكُشك اللي على آخر  
الشارع، وتقريباً دي كانت فرصتي.. استنيت العيبل  
لغاية ما حصلني، ومشيت جنبه.. قرّبت مِنُه وبدأت  
أهزّر معاه.. مشينا لغاية الكُشك، وخلص الواد  
هيرجع لأبوه، وأنا مش عارف أتصرف.. وقفته وطلبت  
منه بمُتهى الوضوح يقولي مين البنت دي.. الواد  
استغرب الأول، بس لما قلت له إني سُفتها، وعجبتني،

وعايز آجي أتقدم لها وأتجوزها، ومعرّش عنها حاجة،  
تقريبًا صعبت عليه.. وبدأ يقول لي بمُتَهى البساطة كل  
حاجة عنها.. اسمها، وفي كُلية إيه، وبنتغل إيه بعد  
الكُلية، وفين، وينزل إمتى، وترجع إمتى، وعايشة مع  
مين، وإن مامتها مُتوفاة، وإنها رفضت عِرْسَان كثير؛  
لُجْرَد إنهم اختلفوا على حاجات في الخطوبة والجواز..  
وإنها مُحترمة جدًّا، ومش أي شاب سِيس زي حضرتي  
كده يقدر يقنعها بنفسه.. شكرته طبعًا، وإديته عشرة  
جنية يجيب بيها أي حاجة حلوة، ووعدته بحلاوة كبيرة  
لو وافقت عليًا.

مشيت من قُدَام البيت وأنا مقرّر إنّي أكلم أمي عن  
الموضوع، وإنّي أجيها وأجي بكرة أتقدم لها.. بس فجأة  
كلام السواق رَنَ في وداني، وإنّي لازم الأول أعرفها  
كويس.. سَجَلت بياناتها على نوت الموبايل، وروحت  
وقعدت في سريري طول الليل؛ أفكر في أي طريقة ممكنة  
تخلّيني أقرب منها، من غير ما أبقى في موقف وِحش؛  
عشان لما أروح أتقدم لها، تبقى عارفة على الأقل إنّي رايح  
أتقدم لها.

بقيت كل يوم قبل الشغل أروح أستأها قُدَّام الجامعة،  
أشوفها وهي داخلة، وأطمئن إنها وصلت، وبعد كده  
أروح الشغل.. وبعد الشغل، أروح أستأها تحت الشغل  
بتاعها، لغاية ما تخلص، وأمشي وراها، لغاية ما أطمئن  
إنها رَوَّجت البيت.. أي «كافيه» كانت بتروحه، كنت  
بروح معاها، بس كل واحد لوحده.. حسيتها شبيهي  
وزني؛ بتعمل كل حاجة لوحدها، مالهش أصحاب،  
مالهش زمايل كثير، بتخرج لوحدها.. أكثر حاجة  
شدتني أوي ليها في الفترة دي؛ إنها كل يوم خميس  
بدل ما تخرج زي أي حد - حتى لو لوحدها - كانت  
بتروح تقضيه في دار أيتام.. كنت بشوف فيها حنية على  
الأطفال، زي اللي بشوفها في عين أمي عليًا.. تقريبًا  
حسَّت باليتم بدري؛ فبتحاول تعوض الأطفال دول عن  
الإحساس ده.. حاولت ألفت انتباهها ليا في كل مكان،  
معرفتش.. سألت عنها في كل مكان بتروحه، كله قال  
عليها إنها إنسانة محترمة.. وملتزمة!

الكلمة خطفتني.. وسألت الشاب اللي كان في الإدارة  
في دار الأيتام، يعني إيه ملتزمة؟! هو مش كلنا ملتزمين

يعني!؟ قالي: «لا، مش كلنا ملترمين.. البنت دي، أكثر  
من حد حاول يكلمها أو يصاحبها، معرفش.. حد ناضج  
وفاهم كويس حدود الكلام مع أي حد.. كان ردّها حاد  
على أي حد يبحاول يتطفّل عليها.. تحسها بنت بـ (١٠٠)  
راجل.. بتقعّد تحفّظ الأطفال قرآن، وتشرح لهم حديث  
وفقه، بجد.. يا بخت اللي هيتجوّزها..»

كنت مبسوط باللي بيقله.. بس أنا إزاي هعرف  
أتعامل مع حد بالمواصفات دي؟! دايمًا كنت بتعامل مع  
الناس اللي بالمواصفات دي بحذر شديد.. كنت أتجنّب  
الكلام معاهم؛ خوفًا إني أعكّ في أي كلام.. أنا ممكن  
أتجوّز بنت ملترمة، تقولي ده ينفع وده مينفعش، وده  
صح وده غلط.. حلو أكيد إنك تعيش بمبدأ الحلال  
والحرام، بس براحة ومرونة، متبقاش الحياة قفّش كده.

بس البنت دخّلت مزاجي جدّا، وأذّيه هي حد كويس  
وجميلة، ومفيش حد سألته عليها إلا واتكلم عنها بكل  
خير.. أنا بصراحة قلقّت، مايقش عارف أنا مختار صح،  
ولأ أرجع تاني أدور وأشوف حد مناسب ليًا ولطريقة  
حياتي، حد كويس ومحترم آه، ونساعد بعض على الخير،



بس مش كده.. لأ، مش مستوعب الصراحة إنى أرتبط  
ببنت بالمواصفات دي!

بعد يومين، لقيت نفسي رايح أستأها، وأطمئن عليها  
في الكُلية والشغل، وأروح وراها أي مكان تروحه..  
لغاية ما في مرة مكُتِش مستوعب اللي حصل..

عَدَى (٣) أيام مَرَّاجِش الكُلية أو الشغل.. كنت  
أفضل مستني لبعده الميعاد بساعة وتكون لسة مجأتش..  
خُفت جدًّا عليها؛ فقرَّرت إن بُكرة أروح أستأها  
قُدَّام البيت، من الساعة (٧) أشوفها وهي نازلة من  
البيت.. أشوفها بتروُح فين، لغاية ما لقيت بنت، بنفس  
المواصفات، ونفس الشكل، نازلة من البيت، بس المرة  
دي (منتقبة).. وهنا أيقنت إن الموضوع بقى مستحيل!

ساحر الكتب  
www.sa7eraikutub.com

# مرحلة الإقناع

٥٩

تم تحميل هذا الكتاب من موقع ساحر الكتب

[www.sa7eraikutub.com](http://www.sa7eraikutub.com)

كنت بكلّم نفسي بصوت عالي وأنا بفكر في الموضوع ده.. أنا اخطب منتقبة! ده مستحيل، أبدا.. ده غير إني محتاج مُعجزة عشان أفنع أُمي بالموضوع ده، أنا محتاج اللي يقنعني.. إيه اللي يغصبني على حاجة زِي دي.. عارف إنه صح، بس أنا ماليش في الصّح الأوي كده.. يعني حلو أوي الحجاب، وينت مُحترمة تصونك، بس تبقى لذيذة كده، إنما إيه اللي يغصبني آخذ واحدة هتعتقدني في حياتي كلها؛ باللي هي عاملاه ده؟!

معرفة حاجة عن النقاب، ولا أحكامه، ولا التعامل معاه.. كل اللي أعرفه إني بفضّل متعاملش معاهم أصلاً؛ عشان يبقى مش عارف أبص وأنا بكلّمهم ولا لا.. طب أنكلم، متكلمش. الموضوع صعب أوي عليّ أنا، فما بالك هبكون عامل إزاي على أُمي.

حاولت أهرب من الموضوع على أد ما أقدر.. بس ما عرفتش، مُسيطرَة على تفكيري وخيالي، ومش قادر أبطل تفكير فيها.. وفي نفس الوقت، مش قادر أتخيل

إزاي ممكن هرتبط بينت منتقبة! بدأت أسأل كل اللي  
حواليًا في الموضوع.. زمايلي البنات قالولي حاجة غريبة؛  
إنهم عاديين جدًا، ومفيش أي اختلاف بينهم وبين أي  
حد تاني، وعُمر ما كان النقاب عَقَبَة في أي حاجة بالنسبة  
لهم.. الاحترام والالتزام في التربية وفي الدماغ من جوّه  
.. عُمر ما كان الاحترام باللبس، فيه ناس لابسة أكثر  
من كدة ومقضييها.. مَها حاولت أقنع نفسي بعكس ما  
أنا مقتنع مش قادر.

طَب هقنع أمي إزاي بحاجة زي كدة؟! بس أنا لازم  
قبل أي حاجة بقى، آخذ موافقتها عليًا؛ عشان مقعدش  
أفكر بيني وبين نفسي كده كثير، ومتعلقش أكثر من  
كده وهي مش ليا. لازم أعرف هي رأيها فيا إيه، قبل ما  
أعرّف أمي أي حاجة.

كانت تايبة عن بالي إزاي!

فتحت الفيسبوك جَرْنِي، ودخلت اسمها، وبدأت  
أدور عليها.. وبعد فترة من التدوير، لقيتها.. بعثتها  
رسالة مكتوب فيها «السلام عليكم»، ودي كانت أول  
مرة أبعث لحد رسالة فيها «السلام عليكم»، وقُلْتُ لما

تُرَدُّ أشرف ما قولها إليه.

استئيت يوم واتنين وثلاثة عشان تُرَدِّ، مَرَدُّش.. كان لازم اكلّمها.. أنا بقالي كثير أعرفها، وهي متعرفنيش.. متابعتها، وهي متعرفش.. أنا خايف أكون بدأت أحبها! أمي ملاحظة التغيير عليّ، وكُلُّ ما تسألني، أحاول أهرب بأي إجابة.. بس أنا فعلاً محتاج رأيها ومشورثها.. بس هقولها إيه؟! البنت أصلاً متعرفش عني أي حاجة.. وأنا يوم ما أفكّر أرتبط وأحب، أقع الوقعة دي! أحب واحدة من غير حتى ما يكون فيه بيننا أي كلام!

واقف في البلكونة بعد العشاء، وبَشْرَب شاي، وبعمل دخان بِيَّي في الساعة، أمي جت وقتت جنبي وسألني كالعادة: «إيه اللي واخذك مني كده؟!».

معرفةش أقولها إيه.. مكسوف أصلاً أقولها إني حبيبت، ولما تسألني حبيبت مين، أقولها إيه؟.. طب أقولها إن البنت أصلاً متعرفنيش، ومش عارف هتوافق عليّ، ولا

١٤٩

وإني مختار أصلاً؟ يا ترى هتقدّر أعيش مع بنت

بالمواصفات دي ولا لأ!

سكتت؛ معرفتش أرد. أمي فاجأتني، وقالت لي أنا عارفة كل حاجة.

أمي كده دايماً؛ بتعرف تلعب على أعصابي، تقول إنها عارفة كل حاجة؛ عشان أحكي كل حاجة.. وأنا زي الأهبل؛ كل مرة أقع في الفخ وأبدأ أحكي.

أنا: «يا ماما، أنا واقع لشوشتي خالص في بنت، ومش عارف هتكون مناسبة ليا ولا لأ!»

أمي، لما يبداً أتكلم، بتسكت خالص، وتركز معايا أوي؛ عشان أكمل من غير خوف. كملت:

أنا: «البنت دي شوفتها بالصدفة في خناقة، كانت ماسكة عيّل بتضربه لأنه عاكسها، ومكانتش

عايزه تسيب حقها، البنت دي جدعة أوي، وحلوة أوي، وطيبة.. مشيت وراها لغاية ما عرفت كل حاجة عنها، سألت عنها في كل مكان، وكُلُّه أجمع إنها بنت ناس، ومحترمة أوي، وأد إيه أنا شايفها شبه الملايكة»  
هنا، أمي ماقدرتش تمسك نفسها، وقالت لي:

«هو إنت سُفَّت الملايكة قبل كده يا قلب أمك؟»  
بصّيت لها كده، ومسينها ودخّلت جُوه.. دخّلت ورايا  
بتضحك، وبتقولي خلاص والله مش هقاطعك تاني..  
وأنا مُصمّم إني ما أحكيش، قلت لها: «والله مانا حاكيك  
حاجة تاني أصلاً.. إيه شغل العيال ده!». ضحكيت عليا  
بكوّباية سخلب عشان أكمل.

أنا: «فضّلت أراقبها يا ماما كل يوم.. أشوفها بتروح  
الكُلية إمتي وترجع إمتي.. بنشتغل إيه،

بتروح فين في الأجازة.. بتخرج فين، ومع مين.. كده  
يعني. لغاية ما لقيت نفسي كل يوم

بَتَشُدّ ليها وخايف أكلّمها، ما إنتي عارفة ابنك؛ لحمة،  
وما بيعرفش بقول كلمتين على

بعض مع أي حد غريب.. وفضّلت على الحال ده  
أسابيع، بَرُضي مشاعري بالشوية اللي

بشوفها فيهم من بعيد، ومش عارف أعمل إيه!»  
أمي: «طَبّ وهتفضّل كده لإمتي بابني؟! إنت لازم

تكلّمها عشان تعرف بس رأيها المبدئي فيك..

هتوافق عليك ولا لأ.. هتعرف ده منين؟ استرجل يا  
حبيبي وروح كلمها، وشوف هتقولك إيه»

أنا: «في أم تقول لابنها استرجل؟! أمهات آخر زمن!  
بس مش دي المشكلة دلوقتي»

أمي: «أومال فين المشكلة يا ضنايا؟!» (بترتقة طبعاً)

أنا: «اليسيت النقاب

رد الفعل كان مُتَوَقَّع.. الموضوع لَفَّ في دماغ أمي  
لَفَّة سريعة، وَنَسِيت كل الكلام اللي قُلْتَه عَنْ البنت،  
وأد إيه هي كويسة ومُحْتَرمة وجدعة، وكل الكلام ده  
مالوش قيمة فُصَاد حاجة معينة.. مشكلة أمي الوحيدة،  
مكانتش في إنها مثلاً ممكن تكون مُلتَزِمة أوي، وإن  
مكانش مُتَشَدِّدَة.. مشكلة أمي، كانت في يوم الفرح  
بس.. هتفرح بيأ إزاي.. هنعني ونطبل ونرقص إزاي  
والعروسة منتقبة؟! لك أن تتخيل إن دي مشكلة أمي  
الوحيدة.

السَّت دي كل فترة بتفاجئني بصراحة.. أمي رفضت  
الموضوع بشدة، رغم عدم اعتراضها على البنت، ورغم



عدم اعتراضها على النقاب. شايقة إن النقاب عادي جداً، طالما هي مقتنعة بيه، بس بعد الجواز.. بس لما تفرح بقى بابنها وعروسة ابنها، عشان تعمل فرح وترقص مع العروسة براحتها. حاولت اوضح لها أذ إيه أنا متعلق بالبنت.

هو الحب كده، يكون في أقوى حالاته وإحنا بعيد.. وإنت بعيد عن الحاجة اللي عايزها، بتكون عارف قيمتها أوي، ومقدرها كده، وشغوف بيها. (حلوة شغوف دي (D:

أمي لما لقيتني واقع خالص، قالت لي: «خلاص يا بني، مهما كان الوضع، ومش عايزين نسبق الأحداث، أهم حاجة راحتك.. شوف هتحل المشكلة دي إزاي.. شوف هتكلمها إزاي، أو توصل لها إزاي إنك بتحبها أو عايز تتجوزها، وساعتها نروح نتقدم لها.. وكده كده إنت جاهز مش ناقصك حاجة.. وأصلاً ألف واحدة تتمناك يا حبيبي». (وده طبعاً بنظرية القرود في عين أمه غزال).

أمي عارفة إنني مش هقدر أجمل المشكلة دي، وإني فعلاً مش هعرف أوقف البنت وأتكلم معاها أو آخذ معاها

حق ولا باطل.. فكّرت إني أوقفها وأخذ رقم باباها  
منها، وأروح أقعد معاه وأكلمه، بحيث إنها تبقى عارفة  
إني هُرُوح، ويبقى عندها فكرة حتى عني. بس خُفت  
أخرجها، أو أخطأها - واحط نفسي - في موقف وِحش.  
الموضوع كل يوم بيتعقد.. كل يوم هي بتقرب أكثر ما  
هي بعيدة أصلاً.. كدة أنا اطمّنت مبدئيًا، إن أمي هتكون  
مقتنعة، لو أنا نجحت في الاختبار ده.. اختبار إني أروح  
أقول لها أبوة أنا عايزك، وعايز أكمل حياتي معاكمي.  
فكّرت في فكرة ممكن تحل المشكلة، من غير ما أخطأ  
نفسي في المواجهة دي. فكرة قرأتها على النت قبل كده،  
وجابت نتيجة كويسة. قلت يمكن تجيب معايا نتيجة  
كويسة. فتحت النت تاني وقرأتها بتركيز واهتمام. ونزلت  
على أقرب مكتبة، واشترت ورق ملون وأقلام وأظرف  
صغيرة وورد وبرفان، وشوكولاتة، وحاجات كتير  
حلوة، ممكن تفيدني في الخطة دي.. عُمري ما فكّرت  
في يوم إني أفكر بالطريقة دي عشان أشد انتباه حد ليا.  
البتت دي فيها حاجة مختلفة، بس أنا مرعوب؛ إن بعد  
كل ده، منكوش مناسيين لبعض، ويبقى الموضوع مُجرّد  
رغبة مش أكثر.. رغبة إن الحاجة الحلوة دي - وشايفها

بتلمع - تكون بتاعتك مش عارف، بس فتعيل اللي  
علبًا، ومش مختصر كثير.. أنا كده كده لوحدتي، وحياتي  
فاضية..

طب وهي، مش ممكن يكون فيه حد في حياتها، زي  
ماهي في حياتي كده!؟

دي تكون مصيبة لو فعلاً كده.. بس لا، أنا أخذت  
بالي من إنها لو حدها، زي ما أنا لوحدتي بالظبط.. بس  
أنا مبقتش لوحدتي.. هي دلوقتي معايا في كل حاجة،  
وحواليًا طول الوقت.

أمي دخلت علبيًا وأنا بجهز كل حاجة، وحطت كوباية  
الشاي جنبي، وقالت لي: «لدرجة دي بتحبها!؟»  
سكتت وبقتش عارف أرد.. أنا حبيتها امتي وازاي!؟

- «حبيتها.. أبوة أنا حبيتها  
مش قادر أنسى ضحكتها

مش يسكن دي فرحة عمري  
والفرحة ما صدقت لقيتها

كان فين اليوم ده غايب عني!؟ كان فيسيسيسين!؟  
تسلملي، وتسلم ضحكتها!  
مردتش، قالت لي:

«يا بني، أنا عِشتَ أعظم قصة حب، وحاسة بيك..  
طَبَّ إيه رايك نروح لهم البيت على طول، من غير اللي  
بتعمله ده؛ عشان نُخس البيت من بابه؟»

عندها حق، بس أنا كنتِ عايز أعرف هي ممكن  
تقبَلني ازاي؟! هتقول عليًا إيه لما أحاول أقرب منها؟  
ولما تعرف إني أعرفها من زمان، وباخد بالي من كل  
حاجة بتعملها وكل التفاصيل.

قُلْتُ لأُمِّي: «لأ، أنا مش هروح البيت عندهم، غير  
لما أعرف رأيها فيا، وياترى عايزاني، ولا لأ. ممكن يكون  
الموضوع غريب شوية، بس هكمله للآخر.. ربنا بعتها  
بالصدفة ليًا، في وقت أنا كنت خالص بفكر إني أرتبط  
أو أدخل حد حياتي. هي دي الإنسانة اللي هكمل معاها،  
أو هفضل زي ما أنا كده.. لو وافقت عليًا، وبقت ليًا،  
هكسب كثير، ولو موافقتش، مش هخسر، رغم  
خسارتي الكبيرة؛ إني هضيع حد زيتها من حياتي. أنا لازم  
أثبت لنفسي إنها هتحبني من غير ما تعرفني، زي ما أنا  
حببتها من غير ما تعرفني»..

# ما قبل البداية

تم تحميل هذا الكتاب من موقع ساجر الكتب

[www.sa7eralkutub.com](http://www.sa7eralkutub.com)

كُلُّ ده، ولَسَّة الموضوع مابدأش.  
فكرة البداية نفسها ترعب، أنا حبيت!

لو إني مبعرفش أعدِّي يوم من غير ما أشوفها وأطمئن عليها، وأشوفها بتروح فين وبتيجي منين، وأسمع صوتها، حتى لو مبتكلِّمنيش.. أسمعها وهي بتتكلِّم مع زمائلها، أو الأطفال في دار الأيتام.. لو إني مبعرفش أعدِّي اليوم من غير ما أعدِّي من جنبها كل كام يوم؛ عشان أتنفِّس منها شوية، يبقى في الحقيقة أنا حبيبتها.. خوفاً عليها ورغبتني في قضاء أكبر وقت ممكن باصص ليها، يبقى أنا حبيبتها، ودي مصيبة لوحدها؛ لأنِّي لَسَّة مش عارف هي رأيها إيه!

ويا ترى هيكون رد فعلها إيه؟!

جِبت الورق كله من لون واحد، بشكل واحد.. الأظرف شبه بعض، وقلم واحد خطُّه مُميِّز؛ عشان تعرف إن شخص واحد اللي كاتب الكلام ده. راهنت نفسي إني

أخْلِيبها تفكر فبًا في أسبوع واحد بس. في أسبوع واحد  
تحاول تدوّر عليًا زي ما أنا دوّرت عليها كثير أوي.

كانوا خمس أظرف.. كل ظرف مكتوب فيه حاجة غير  
التاني.

### (اليوم الأول: الظرف الأول)

كان لازم أشوف حد جوّه الجامعة يعرفها كويس؛  
عشان يروح يديها أول جواب مني.. هو مش جواب  
أوي، بس أهو اللي عرفت أقوله في أول رسالة ممكن  
تقرأها مني، وبها إن الفلوس تحرك أي حاجة، قِدِرت  
أخش الجامعة، بعد ما فهّمت الأمن الموضوع، وأدّ إيه  
اتعاطفوا معايا، بس طبعًا التعاطف لوحده مش كفاية،  
كان لازم أشخلل عشان أعدي.. ودخلت الجامعة،  
ودي كانت أول مرة أكون معاها جوّه الجامعة، بشوقها  
وهي بتعامل مع زميلها وأصحابها.. أدّ إيه هي كائن  
«برنس»؛ بتعسل كل اللي نفسها فيه، من غير ما حد يقدر  
يقولها بَلت الثلاثة كام.

قِدِرت من ملاحظتي ليها، أعرف مكان المُدرّج اللي

هي فيه.. وأشوف مين من العمال مسئول عن نضافة المدرج.. كان راجل عجوز كبير في السن.. اتصاحبت عليه، وحكىته الموضوع بالتفصيل.. صمّم يعزمني على شاي، واتكلم معايا بمتهى الصراحة.

العجوز: «بص يا بني، إنت شكلك ابن حلال، ومش بتاع لعب ولا تسلية.. البنت اللي إنت بتتكلم عليها دي، مش بتاعة لعب زي بنات اليومين دول»

أنا: «والله يا حاج أنا ولا عايز ألعب ولا عايز أتسلى، أنا قادر آخذ والدتي وأروح أتقدم على طول، بس أنا مش هقدر أحرها؛ فعايز أخليها تتسلى بس الأول قبل ما أروح؛ عشان إن شاء الله توافق عليا.. هو أنا شكلي بتاع لعب يا حاج!»

كان سهل بصدقني لأنى فعلاً ميكذبش. أنا مش عايز اللعب ولا أتسلى، أنا عايزها، ومش هقدر أعيش من غيرها خلاص. كل يوم بيخوت، الموضوع بيكبر جوايا بشكل مريب. الراجل خد مني الظرف، وفضلت واقف أتابع من بعيد، لغاية ما اتأكدت إنه في إيديها.. إحساسي في اللحظة دي ميتوصفش.. أول رسالة حبيبتى هتقرأها



كانت: «أذ إليه إنتي حلوة أوي.. آه حلوة جدًا من أول  
مرة سُفِّتِك فيها.. أنا حد عايزك تشاركه في كل حاجة  
في حياته.. حد يعرفك كويس، وإنتي عمرك ماشوفتيني  
أو تعرفيني.. ماتبصيش حواليك، أنا مش هنا..  
مش حواليك.. أنا من بره الجامعة، وجيت وراكي؛  
عشان أقولك إني محتاجلك في حياتي.. تسمحيلي أكون  
حلالك!»

مِشِيَت وهي بتبص حواليتها، تقريبًا بتدور عليًا في  
وشوش كل الناس، بس ما لقتيش.. إحساسي في  
الوقت ده مش هقدر أوصفه.. إحساس إن الإنسانة  
اللي بتحبها، معاها حاجة منك دلوقتي، مش هتفارقها..  
الإحساس ده مُبهج أوي.. اتأكدت من الراجل العجوز  
إنها احتفظت بالورقة بعد ما قرأتها، مقطعتهاش ولا  
رميتها زي ما أنا كنت خايف.

(اليوم الثاني: الظرف الثاني)

النهاردة المهمة هتكون صعبة شوية؛ إنك تقنع بنت،  
شغالة في المكان اللي هي بتقعد فيه باستمرار، إنها تديها  
الظرف ده، مع المشروب اللي بتطلبه دايمًا، مهمة صعبة..

تقدر تقول غيرة بنات.. أو خوف على أكل عيشها.. بس  
فعلاً خذت وقت عشان أفنع البنت اللي شغالة في المكان  
نعمل ده.. رُوحت قبلها بيوم، اتكلمت مع البنت،  
وحكى لها حكايته من الأول للآخر، وقلت لها على  
موضوع الراجل العجوز اللي ساعدني، وطلبت منها:

«بكرة لما تيجي تطلب العصير كالعادة، تديها،  
وتقوليلها إن فيه حد سابوها امبارح، ومقالش اسمه»..

أنا كنت قاعد في الترابيزة اللي جنبها.. متابع الحوار  
من الأول للآخر.. خدت الظرف منها، وسمعتها وهي  
بتقول: «البنى آدم ده بقى طلعي منين وعايز إيه!».

حطت الجواب في الشنطة، من غير ما تفكر حتى تبص  
عليه أو تفتحه أو تقراه.. حسبت إن دقائق قلبي ممكن  
تفضحني! من كتر ما أنا كنت سامعها. كان نفسي أحس  
بأي قبول منها، أو يكون فيه رد فعل، أو كلام يبين إنها  
موافقة على المجنون اللي بعثها جوايين في يومين مختلفين.

طلعت تليفونها، واتصلت بباباها، وقالتله بصوت  
متضابق «الحق يا بابا، الأخ بتاع امبارح عمل نفس  
الحركة دي النهاردة، بس في الكافية اللي بقعد فيه»..

تقريرا كده حكيت لباباها عني او عن جواب امبارح  
ومن كلامها إنها وباباها أصحاب.. أنا خُفت الصراحة  
من رد الفعل العنيف ده، وخُفت بسبب النبوة اللي  
مربحْتبش دي إنه يكون خد قرار إنه لما يعرف مين  
صاحب الجوابات دي؛ يكون مصيره الرفض. خُفت،  
وقررت إنى أبطل الموضوع ده، وإنى لو هروح أتقدم،  
مش هجيب سيرة الموضوع ده.. سمعتها بتقول لباباها  
إنها فتحت جواب امبارح؛ لأنها مكانتش تعرف فيه إيه،  
أو مين صاحب الجواب.. إنها المرّة دي مش هينفع تفتحه  
أو تقراه عشان حرام.

كنت عايز أقوم أقول لها أنا أهو والله، أنا اللي كاتب  
لك الكلام ده:

«أنا اتعلقت بيكي من غير ما أحاول أكلّمك، كل يوم  
بتقرّبني مِنِّي أكثر، رغم إنك مش هنا.. أنا فعلاً يوم ما  
قرّرت إن يكون ليا شريك في حياتي، رينا حطّك قُدّامي،  
ومن ساعتها مش راضية تروحي من قُدّام عينيّا.. أنا  
عناجلك.. تسمحيلى!»

كنت هقوم أقول لها إن صاحب الكلام ده أنا، يس

بعد ما سمعت كلمة «حرام» دي اتصايقت أنا، وبيت  
المكان كله ومثيت.. فين الحرام في اللي بعمله ١٩ شُفت  
بنت عجبتني، ومقرّر أروح أتقدم لها، وعايير أعرفها  
مشاعري، وأعرف مشاعرها قبل ما أروح أتقدم، فين  
الحرام في كده ١٩ هي بدآت يكده! فعلاً مكنتش طابق  
نفسى، حايبت ومثيت؛ لأنى لو كنت فضلت، كنت  
قُمت حطيت رَشها في الطبق اللي قُدّامها من الغيظ!

روّحت البيت متضايق، وأمى لاحظت ده.. خُفت  
أحكي لها الصراحة.. هاقولها إيه! كلمتين في ورقة بقوا  
حاجة حرام! مينفعش يتفروا! كنت ساكت وجوابا  
ضيق وغيظ منها بشكل كبير. كنت هرّجّع أقول لها إنها  
غية، وإنى أغبى منها؛ لأنى فكّرت إنى أرتبط بيها في يوم  
من الأيام.

حكيت لأمى على اللي حصل.. قالت لي مش يمكن  
هي من جوابها فرجت بالكلام اللي في أول جواب،  
بس فعلاً مينفعش تقرأ التاني.. هي أكيد أدري بالحلال  
والحرام مِننًا.. مش يمكن احتفظت بالجواب التاني  
عشان تقرأه، لما تبقى خطيبها أو جوزها.. كلام أمى

هدائي شوية، بس مرتجيش، لسة تعبان بسبب رد الفعل  
الغبي ده.. كنت شايفه غباء فعلاً.

(اليوم الثالث: الظرف الثالث)

رغم إحسامي بالضيق منها، لقيت نفسي بكرر اللي  
يعمله، بنفس البرنامج كل يوم؛ أطمئن عليها قبل الكلية  
وبعد الشغل.. قرّضتس أكثر موضوع الجواب، وبسبتها  
يومين ثلاثة أشوف رد فعلها إيه.. مكانش فيه رد فعل  
خالص. هي ممكن تكون مبسوطة باللي بيحصل، بس  
مش هتسمح بيه؛ لأن تقريباً ده مش صح، وأظن إنها  
قدّامي ممكن متبيّش فرحتها بالحركة دي.. مش عارف.  
أنا مش فاهم دماغ الناس دي بتفكر إزاي، بس كل اللي  
أعرفه إنها هانت خلاص.

قرّرت أسبب لها الجواب الثالث، سواء كانت لياً أو  
لا، فهي في يوم هتقرأ الكلام ده، سواء حلال أو حرام،  
بس هتقراه.. عايز أوصلها إنها فعلاً ضايقتني في اليوم  
ده.

كان أسهل يوم عليّ؛ لأن الشخص اللي في الإدارة هنا  
أنا اتكلّمت معاه قبل كده، حكيت له باختصار عن اللي

بفكر فيه، وإن خلاص كلها كام يوم وهروح القدم لها،  
بس عايز أدبها الظرف ده من غير ما تعرف إنه مني..  
ساعدني في ده، وأنا مثبت وهو مأكد عليا إنه هيوصله  
ويكون في أيديها. كتبتهلها فيه: «سواء هتقري الجواب  
ده وإحنا سواء، أو واتي لوحدك لما أختفي من حياتك  
خالص، حاب أقولك إنك أحل غيبة أنا شفتها في  
حياتي».

محاولتش أقعد اليوم ده؛ عشان مسمعش كلام  
بضايقتني وبخليني لروح أكلّمها، أو أعمل أي حاجة  
أرجع أندم عليها.. سالت نفسي سؤال؛ أنا إزاي هكمل  
معها، وحاجة نافهة زي دي قلبت مزاجي بالشكل  
ده!؟ دي تُعتبر حاجة صغيرة، فبعض حاجات كثير  
أكيد، هتواجهنا في الحلال والحرام، أو اللي ينفع واللي  
مينفعش. مبقش فاهم حاجة.. بسبت المكان ومثيت،  
وأنا مش عارف هعمل إيه بعد كده!

عدت الأيام، يوم ورا الثاني وأنا مبخرجش من  
البيت.. ولا بروح شغل، ولا بفكر حتى أنزل أشوفها..  
خايف أكون اخترت غلط.. اللي أنا فيه ده أكبر دليل

إلى حينها، وأوي كمان. بس خايف لتواجه مشاكل في حياتنا بسبب الاختلاف ده.

أمي مقديرش تستحمل اللي أنا فيه ده.. قالتلي: «انزل هات رقم باباها، وكلمه، وخد منه ميعاد عشان نروح نتقدم لها». وفعلاً بعد محاولة من أمي، نزلت جيت الرقم من البواب، واتصلت بباباها، وعرفتته بنفسي، وخذت منه ميعاد وعرفت والدي بالميعاد، وبدأنا نحضر نفسنا لليوم ده. أنا فعلاً مرعوب من رده، وكنت قبلها نايم ويتمنى النهار يبطلعش؛ عشان متصليش من الرد، لو كان رفض.. بس فعلاً، رغم احتياجي ليها، وإحساسي ده، كنت لسه شابفها غيبة جداً.

# سُخْرِيَّةُ الْقَدَرِ

تم تحميل هذا الكتاب من موقع سائر الكتب

[www.sa7erkitub.com](http://www.sa7erkitub.com)



أنا ما اختارنش أصحابي، أصحابي هُما قَدْرِي، هُما  
المصيبة، اللي ما أفدرش استغنى عنها في ديني.. كان  
لازم أحكي لهم على اللي حصل.. كان لازم يعرفوا اللي  
بفكر فيه، واللي نويت عليه.

أنا نويت أروح أجيب رقم باباها، وأخذ منه ميعاد..  
وفعلآ عرفت أجيبه من البواب المرة دي، وكنت مُباشِر  
وصريح معاه: «لو سمحت، أنا عايز رقم فلان الفلاني؟  
عشان عايز أتقدم لبتته، وعايز أكلّمه أخذ مِنُه ميعاده».

يومها، جمعت أصحابي في المكان اللي بنقعد فيه  
كالعادة.. كل اللي يعرفوه من المرة الأخيرة، إني قرّرت  
أخطب.. محدش عرف آخر التطوّرات؛ لاني محكّيش  
لحد عليها.

بعد السلامة والأحضان، وكل واحد قعد يحكي  
عن يومه ومشاكله، أنا بدأت أحكي عن الموضوع من  
أوله لآخره.. عن مُراقبتي ونظراني ليها، عن مكانتها اللي  
بتكبر جُوابا كل يوم، وعن غيظي منها لما سمعت كلمة

«حرام» على حاجة بسيطة خالص.

كله أجمع على حاجة؛ إننا مش هننفع لبعض، عشان  
إحنا مختلفين.. كل واحد فينا له طريقة تفكير وميول  
واهتمامات.. بس فيه كلمة ضايقتني أوي، قالها حد من  
أصحابي:

- البنت الملتزمة يا بني، يوم ما هتشد لحد، عمرها ما  
هتبيّن ده، وهتكرون مشدودة لحد بسبب

التزامه، وقُربُه من ربنا، وقُرب شخصيته من الصحابة  
والتابعين كده، إنها هي هتشدلك ليه أو

توافق عليك ليه؟! هُما ليهم تفكيرهم وحياتهم،  
وينجوزا من بعض، إنها ولا هي تنفعك ولا أنت

تنفعها.. هتلاقي إن اختلافات تافهة ممكن تنكد عليك  
عيشتك كلها.. يبقى ليه من الأول؟!!

إنت شخص محترم آه، مفيش حد يقدر ينكر كده، إنها  
بالنسبة لها، مش الشاب المسلم كما

ينبغي.. مهما كنت بتحاول تكون كويس، فأنت  
ناقصك حاجات كتير عشان توصل للمكانة دي، وده  
هيكون سبب مشاكل كتير بينكم.

إنت عايز تمارس طُقوس مُعيّنة، في مناسبات مُعيّنة؛  
زي مثلاً (عبد الحب، رأس السنة.. إلخ) وهي هيكون  
عندها إن الحاجات دي بدعة، ومش هتحتفل معاك  
بيها، رغم إنها ممكن تكون بتحبك ومتجوزاك، بس  
اللحظات دي مش هيكون ليها نصيب بينكم؛ لأن  
بساطة هي شايقة إن ده حرام.

- كل الكلام ده صح، بس محدش خدّ باله إني حيتها،  
وإن مش لازم يعني الإنسان اللي هنكمل معاه، يكون  
زي ما إحنا عايزين بالظبط، يعني زي ما أنا هستحمل  
إني أتحمم من لحظات زي دي؛ بسبب إنها شايقة إنها  
حرام ومتنفّس، هي كمان تستحمل تقصيري ساعات،  
وتعيني على القُرب من ربنا؛ خصوصًا إن القرب من  
ربنا بيكون مختلف من كل شخص للتاني. أنا متأكد  
إن رغم اختلافنا، هتكون حياتنا كويسة؛ عشان كل  
واحد فينا عايز التاني.

- بس هي مش عايزاك، وبالشكل ده تقريبًا عمّرها ما  
هنعوزك، وهيكون رأيها فيك.. الرفض.  
مش عشان إنت حد مش كويس، بس عشان إنت

حد ما بناي سبهاش .

- مين قال كده؟! مش يمكن لما تشوفني وتتكلّم

معايا، تغير رأيها.. لما تشوف إصراري عليها

تغير رأيها وتوافق عليا، وتكون سبب إني أكون  
أفضل من اللي أنا عليه.

كنت مُستعد استغنى عن أي حاجة عشان أكون معاها،  
دخلت قلبي من غير إحتم ولا ذنور، واثم لكنتي، من  
غير حتى ما أتكلّم معاها أو أشوفها كام مرة على بعض ..  
ملاعجها التحقّرت جورايا خلاص .. عرّفتهم إني خلاص  
جيت رقم باباها، وهكلمه، وأخذ منه ميعاد.

طبعًا بعد ما شافوا إصراري إني أخذ الريسك ده،  
وأخش على الخطوة دي، استسلموا للأمر الواقع، اللي  
بقي واقع فعلاً، من طريقة كلامي. ولما اتصلت قدامهم  
على باباها، وعرّفته بنفسي، وطلبت منه ميعاد أزوره فيه  
أنا ووالدي، وبعد ما قفلت معاها، اتهرت طريقة منهم؛  
لأنهم شافوني مُرتبك وأنا بكلمه.. يمكن الراجل صوته  
طيب جدًا، بس أنا مُرتبك؛ لأن أول مرة أقرب من  
الشريجة دي للدرجة دي.. فكنت خايف من رد الفعل،

بس الراجل طلع طبيعي جدًا، ورَّحِبِ جدًا بطلبي.  
سَلِمْتَيْشُ من تَرْيِقَتَهُمْ، وإنِ خلاص مَبْقَى نصيلة  
الشيخ، وبعد الخطوبة هجبلهم بالجلاية والقفطان..  
حاولت أقول لهم إن البنت بطبيعتها، مَرِحَة وعادية،  
بس مُلتزِمة شوية، وإن اللي أنا لاحظته إنها مش بعيدة  
عن الحياة، هي بتحاول تبعد عن الحرام، بس مش أكثر.  
بس طبعًا محدش كان هيفهم ده. خلصنا قعدتنا ومثينا.  
فبضل منهم واحد، ساكن قريب مِنِّي .. سألني، إذا كنت  
بحبها ولا لا..

- ابصراحة، أنا مش متأكد إذا كنت حبيبتها ولا لا،  
بس اللي متأكد مِنْهُ؛ إنِ مش هسمح لها، ولا  
لأَي حد في الدنيا، إنه بيعدي عنها.. فكرة تَمَلُكُهَا،  
وانها تكون لِيَا بأي شكل، مُسِطِرة عَلَيَّا،

مش مستحمل بس أَنُحْيِلَ إنها لحد تاني.. وبعدين يعني  
الواحد مش مبيع في الدين أوي، ومتأكد إن الحياة هتبقى  
مليانة مُتَع يعني، بس في الحلال.

الحلال اللي مبقيناش نحاول ندوِّر عليه في كل  
تصرفاتنا، رغم إنه موجود في كل حاجة، ويمكن

تفاصيل صغيرة تدخلنا الجنة، وتفاصيل صغيرة ترمينا  
في النار.. مش عارف، بس اللي متأكد منه إي هتعلّم منها  
كثيراً

ياترى هي دلوقتي قرأت الجوابين التانيين، ولا لا؟  
أكيد لا، مش محتاجة سؤال، شخصية زي دي هترقب  
ربنا في كل تصرفاتها، ومستحيل تعمل حاجة زي دي!  
بس أنا هتجنن إيه الحرمانية في كده؟! ماهي ممكن  
تقرأ كلام أصعب من ده، في رواية أو كتاب.. هي جت  
على الكلمتين بتوعى يعني؟!

روّحت البيت، وقلت لأمي إني كلمت أبوها وخذت  
منه ميعاد.. أمي دثّعت ومكانتش مصدّقة؛ خلاص  
إنه جه اليوم اللي تروح تخطب فيه لابنها.. حاجات  
كثير بشوفها في عيون أمي مبفهمش معناها، ولما أسأها  
دايمًا تقول لي: «لما تخلف هتعرف.. لما يكون ضناك كل  
يوم بيكبر قدامك هتعرف.. لما كل يوم ضناك يعمل  
حركات، إنت كنت بتعملها وإنت صغير، هتعرف».

الست دي نعبت معايا أوي في حياتي، مهما كبرت  
وشلت مسئولية، هي لسة شايلة عني حاجات كثير

أوبى، مش متخيل في يوم إنا نسيبي وتمشي خلاص، أو  
إنا نموت زي ما كلنا نموت.. كل مرة بشوف جنبها  
عليًا، بتمنى إن يومي يبقى قبل يومها، مش هقدر أعيش  
في الدنيا من غيرها، ويمكن الخوف ده سبب رئيسي في  
إني فكّرت في الخطوة دي، واني أفرحها بيًا قبل ما تسب  
الدنيا وتمشي.. كل يوم الصبح، أول ما أصحي من  
النوم، أروح أشوفها صاحبة ويتعمل إيه، وأحمد ربنا؛ إن  
الموت إذانا يوم كمان تعيش فيه سوا، وإن مش النهاردة  
اليوم اللي هفارقها فيه.

رغم إني شحط، وبقيت أطول منها، بس كنت دايماً كل  
ما أكون فرحان أو قلقان، أروح أنا معاها في أوضتها..  
نايم في حضنها وتحكي لي حواديت زي العيال الصغيرة..  
كانت دايماً تقول لي: «أنا مخلّفة عيل ميكبرش أبداً».

دخلت عليها الأوضة، ونمت في أحضانها.. قعدت  
تحكي لي عن أبويا، وعن يوم خطوبتها.. وأدّ إيه إن أبويا  
كان مالي عينيها، من أول يوم شافته فيه. دعت لي بالخير  
والفرحة مع البنت اللي اخترتها.

تاني يوم الصبح، خدّتي من إيدي، ونزلت اشترت لي

بدلة.. كنت شابت في عينيها فرحة، عُمرِي ما هُتَاسَها.  
بعد ما خلصنا، صمّيت هي نحاسب، رغم إنها بتستغلني  
في حاجات كثير، بس صمّيت إن اليوم ده هي تتكفل  
بيها، من أوّلها لآخره.

روحنا بعديها على أحسن فحل حلويات في مصر..  
وقعدت نختار وتنفي من كل حاجة. كانت فرحانة بيّا  
لدرجة إنها عابزه تاخذ الدنيا كلها وهي رايحة نخطب  
لابنها.. كنت حاسس بيها أوي، بس البنت اللي حبيتها،  
مكانش راضية بروح عن بالي.. كان نفسي نكون زي  
أي (٢)؛ أكون بكلمها بلوقتي على التليفون، وبوزيها  
البدلة اللي هلبسها وأنا رايح أقدم لها، وأقول لها أد إيه  
أمي فرحانة بيها، من قبل ما تشويها. وكفاية إن هي اللي  
قدرت نخطفني من الدنيا كلها.

بس الحمد لله، مش كل حاجة بنعوزها بتكون.

خلصنا لفّ على المحلات، وبعد ما اشترينا لأمي  
هدوم جديدة؛ عشان نحضر بيها اليوم ده، روحنا وفتحنا  
علبة من علب الحلويات، وقعدنا ناكل ونضحك سوا؛  
على كل حاجة وأي حاجة.. وزّي كل عيد، محدش فينا



عرف بنام.. أمي كان بالنسبة لها اليوم ده عيد.. أنا ابها  
الوحيد، وخلص متفرح بيه.. وأنا كمان كنت حاس  
بفرحة كبيرة، وثقة في ربنا إنه مش هيوجيني في البنت  
اللي حينها.. لأنى محاولتش ألعب بيها، ولا أبعد قبل  
كده.

اتصلت بوالدها عشان أكّذ الميعاد، وفعلاً كانوا في  
انتظارنا.. أنا عارف انهم عايشين لوحدهم، حتى في  
الموضوع ده هي شيهي، نفس ظروف المعيشة والبيت،  
لِبت هدومي، وأمي صميت تربطلي الكرفانة؛ عشان  
هي كانت دايماً بتعمل الحركة دي لأبويا الله يرحمه ..  
عَظِطت كبير وهي بتلبّسني؛ لأنها كان نفسها أبويا يحضر  
اليوم ده، بس الحمد لله.. روحه موجودة، وكفاية إنها  
دايماً تقول لي أنا بشوفه فيك.

وزي الأفلام كده، لقيت نفسي بوطي أبوس إيديها..  
وحاطط دراعها في دراعي زي العريس والعروسة،  
ونزلنا عشان ناخذ تاكسي؛ عشان توصل بسرعة، بدل  
هدلة المواصلات.

يشاء القدر إنى أركب مع نفس سواق التاكسي،

اللي كان موجود في أول مرة شُفَّت البنت فيها. افكرني  
وضحك أوي. وحكيت له على كل اللي حصل، واني  
النهاردة رايح أتقدم لها.

السواق: «تصدق خيبت ظني فيك.. آسف يا بني،  
كنت فاكرك شاب سيس من شباب اليومين دول  
وعاجباك اللعبة، وقلت تلعب شوية، والبنت  
عشان محترمة، فهتكون صعبة، وانت بقى  
استخيلت الموضوع، بس ربنا بحميك يا بني  
ويكثر من أمثالك»

أمي دخلت في الموضوع، فحكيت لها إن هو  
السواق اللي كنت راكب معاه يومها، وأمي قالت له  
بمتهى الفشخرة: «لا، أنا عرفت أربي برضه».  
وصلنا الحمد لله. الراجل دعالنا بالحير والقبول..  
طلعنا، وضرينا الجرس.. وربنا يستر: D.

# يوم الامتحان يُكرَمُ المرءُ أو يُهان!

٩٥

تم تحميل هذا الكتاب من موقع ساجر الكتب

[www.sa7eraikutub.com](http://www.sa7eraikutub.com)

كنت طالع على السلم كأن ربيع امتحان ثانوية عامة،  
من غير ما أذاكر كمان. أمي طبعًا مبسطة ومطعنة،  
وينظمني ويقول لي: «أبوها يلاقي ريك فين يعني؟»،  
وطبعًا هي ماشية ببدأ القرد في عين أمه غزال.. أنا  
كنت مرعوب؛ لأن المرحلة دي جديدة عليًا، أه مُستقر  
مادنيًا، وعندني ما يؤهني للجواز، بس الرئيسك ده نفسه  
صعب عليًا، أنا متجاوز وبقى مشول عن أسرة وبيت  
وأولاد، ده أنا - حتى الآن - أمي اللي مشولة عني.

هي تقريبًا اللي بتعملي كل حاجة، أنا بادوب بتشغل،  
ولو بخرج كل فترة مع أصحابي وخلص ويتكون مطمن  
إيه في البيت، إزاي هتكون رب البيت ومشول عنه؟!

كمان عندي إحساس؛ إن أول ما أخش على أبوها،  
هلاقيه يقول لي ستمعلي القرآن كله، أو يقول لي طلع  
موبيلك، ولو لقي فيه أغاني مثلاً، هيقول لي معنديش  
بنات للجواز.. كنت مرعوب من الفكرة نفسها، بس  
أمي مطعنة؛ لأنها قالت لي: «أكيد اللي بيراعي ربنا في كل

حاجة، الواحد يسلمه رقبتة وهو مطمئن يعني"، ورغم تفكير أمي بالمنطق ده، كنت حاسس إنه جايني النهاردة عشان يعجزني؛ لاني مش لونهم، أو مش هعرف أعيش بنفس طريقتهم في الحياة، اللي أنا شايفها مُستحيلة، أو من وجهة نظري أنا؛ لأنهم عايشين زي الفل عادي يعني.

كنت مُتخيّل كل السيناريوهات المُمكنة لليوم ده.. كنت متأكد إني هطلع من البيت ده، قفايا بيقمّر عيش، بس كان لازم أعرفها إني عايزها وبحبها.. إزاي؟! معرفش!

فجأة، وأنا سارح في كل ده، كانت أمي ضربت الجرس، وأبوها فتح الباب وبيرحب بيانا.. فُقت على إيده وهي ماسكة إيدي ويسلم علياً ويقول لنا: «اتفضلوا». عرّفنا على أخته الصغيرة، عمّة العروسة، وزَي صاحبته.

كنت عامل زَي اللي مضروب على دماغه، وبحاول أستوعب الموقف.. بحاول أبص بعنيًا على المكان كله؛ عشان أعرف الفرق بين المكان هنا وأي مكان في الدنيا..

مفيش فرق؟ نفس التفاصيل اللي موجودة في كل بيت،  
مفيش أي اختلاف. رُحِبَ بينا جدًّا، وقعدنا. كنت  
مرعوب من أول سؤال ممكن يسأله، كنت قاعد جنب  
أمي مرتبِع إيدي، زي العيَل الصغير.. كأي قاعد قُدَام  
مُدْرَس في المدرسة وأنا عيَل صغير، عملت مشكلة،  
وَمُتَدَعَى ولي أمرِي.

الراجل وَشُهْ بَشُوشِ جدًّا، مُبْتَسِم طول الوقت،  
وصوته هادي، مش زِي ما أنا كنت مُتَخِيل.. بعد  
الترجيب، أخته استاذت ثانية، ورجعت هي والقمر.

أقصد يعني بنته، وجايبة معاها العصير، أمي مِيلت  
عليًا وقالت لي: «مش إنت قولت منتقبة يا ولا؟!»  
قولت لها بصوت واطي: «آه والله.. بس مش فاهم يعني  
إيه النظام؟! بتلبسه يوم ويوم ولا إيه!».

حاجة كده مالهش وصف، جت وحطت صينية  
العصير قُدَامنا، وقعدت جنب باباها.. أمي ضحكت  
وقالت ما شاء الله، عروستنا قمر، وياعيني البنت وَشْهَا  
جاب ألوان.. أبوها بدأ يتكلَّم معايا وكان كلامه فيه  
أسئلة غير مباشرة من عَيِّنَة:

- انت معاك إيه؟

- بتشتغل إيه؟

- عندك شقة؟

ولسة وشه بشوش زِي ما هو.

جاوبته على كل ده، وهو بصراحة مدخلش في تفاصيل؛ زِي بتقبض كام أو هتعيش إنت وبتي إزاي، والحاجات اللي زي كدهموت.. كان راجل رزين جدًا، سألني سؤال أخير، هزني من جوابا أوي.

- علاقتك عاملة إيه مع ربنا.. بتصلني؟

على أد ما كان السؤال مُتوقَّع؛ لأنني طبعًا كنت مُتوقَّع أصعب من كده، زِي إنه يسألني في القرآن، بس السؤال نفسه وثرني شوية.. بَصَلِّي آه، بس ساعات بَكَسِّل، يعني لو تعبان شوية ممكن أكسل أصلي الفرض، وعادي وأهو ربنا يسامح، أُمِّي رَدَّتْ بالنيابة عني:

- آه.. ابني ما شاء الله عليه يعرف ربنا كويس.

أنا فعلاً أعرف ربنا كويس أوي.. وبجبهه، دايتًا جنبي ويكرمني رغم إنني مقصّر في حقه.. أعرفه كويس

وعارف إنه معاها في كل حاجة، بتصل بس بس على طول  
، بحاول أكون كريس بس دايمًا مقصر .. كنت شايف إنه  
عادي، يمكن لأن محدش عثره لجرًا أو سألني السؤال ده.  
البنت من أول القعدة مرفعتش عينيها من الأرض،  
مكسوفة على مرتبكة، وده باين على ردودها اللي من  
كلمة واحدة على كل حاجة أمي بتوجهها ليها.

من غير مقدمات، لقيت أبوها يقول لي: «طبعًا بابني  
إنت عارف الرؤية الشرعية .. إحنا قاعدين جنك أنا  
وأخني والحاجة .. وهسيكم مع بعض شوية».

كنت عايز أقول له «والله يا عمي أنا ما فاهم إنت بتقول  
إيه»، بس إشطة يعني .. الصلاة كانت كبيرة، أو تقريبًا  
صالين في بعض .. هو ووالدتي قعدوا بعيد عتنا بس  
شايفين، وأنا قاعد مع العروسة!

(صمت)

مش عارف أقول إيه .. كنت بتفكر أفتح الكلام؛ بياني  
أقول لها إن صاحب الجوابات، بس خفت أخسرها ..  
بفيلت ساكت، بتصلها ويس .. الملامح لوحدها خلّتني  
مش قادر أتكلّم.



عابز أفضل باصص لها بس، وهي في الأسود تحفة  
مش عارف من حقي أبص أوي كده وأتملى من جمالها،  
ولا لا!

خُفت تأخذ بالها إني بيُصِّلها، فتزعل أو تأخذ عني  
فكرة سيئة.

(صمت)

إيه صح الرؤية الشرعية اللي قال عليها دي ١٩ ما علينا.  
هنفضل ساكتين كثير.. كان لازم حد فينا يكسر  
حاجز الصمت ده، وبها إني الراجل، ف لازم يكون عندي  
البداية.. قُلت أخش في الأسئلة المباشرة اللي هتخليها  
تسألني بقي، والكلام يجيب بعضه، بدأت أسألها عن  
دراستها، ويومها يمشي إزاي، ويسئها، واهتمامتها،  
وكانت كل حاجة مُناسبة، أو يمكن عشان أنا عارف كل  
حاجة لما راقبتها وسألت عليها، فكان بالنسبة ليًا كل ده  
مُناسب من قبل ما آجي. كانت رُدودها عبارة عن كلمة  
أو كلمتين.. الخجل والكسوف كان واضح جدًا عليها..  
بس هنا رميت الكورة في ملعبها عشان تسأل هي..

سكيت شوية كده، بس تقريبا أبوها معرفها الوقت اللي  
هتقده معايا، وكان لازم تعرف مني كام حاجة عشان  
نكون رأيها فيا.. وشها كان مرتاح ومريح وهي بتكلم..  
وده معناه - من وجهة نظري - إنها مش مضطرة تقعد  
معايا، وإني لو حد مناسب، هتوافق عليا.. سألتني:

- أخبار الصلاة معاك إيه.. صليت المغرب قبل ما  
تيجي ولا لا؟

- عامل إيه مع أهلك.. علاقتك بيهم عاملة إزاي؟

- ميولك السياسية، مؤيد مين ومعارض مين؟

فجأة كده، حسيتها بردت.. إيه موضوع الميول  
السياسية دي؟! بس الصراحة عندها حق.. من حقها  
تعرف الحاجات دي؛ لأنها لو وافقت، هتعيش معايا  
حياة كاملة.

حكيت لها عن أبويا الله يرحمه، حكيت لها عن علاقتي  
بوالدي، وإزاي إننا أصحاب.

بالنسبة للصلاة، جاوبت السؤال من آخره، كنت  
مبسوط أوي إن أمي صممت أصلي المغرب قبل ما

سكيت شوية كده، بس تقريباً أبوها معرفها الوقت اللي  
هتفعده معايا، وكان لازم تعرف مني كام حاجة عشان  
تكون رأيها قياً.. وشها كان مرتاح ومريح وهي بتكلم..  
وده معناه - من وجهة نظري - إنها مش مُضطرة تقعد  
معايا، وإني لو حد مُناسب، هوافق عليا.. سألتني:

- أخبار الصلاة معاك إيه.. صليت المغرب قبل ما  
تيجي ولا لا؟

- عامل إيه مع أهلك.. علاقتك بيهم عاملة إزاي؟

- ميولك السياسية.. مؤيد مين ومعارض مين؟

فجأة كده، حسيتها برّدت.. إيه موضوع الميول  
السياسية دي؟! بس الصراحة عندها حق.. من حقها  
تعرف الحاجات دي؛ لأنها لو وافقت، هتعيش معايا  
حياة كاملة.

حكيت لها عن أبويا الله يرحمه، حكيت لها عن علاقتي  
بوالدي، وإزاي إننا أصحاب.

بالنسبة للصلاة، جاويت السؤال من آخره، كنت  
مبسوط أوي إن أمي صمّيت أصلي المغرب قبل ما

تَنزَّلُ؛ عشان ربنا يكتب في وِشْنا القبول.. قُلْتُ لها،  
بالنسبة للمغرب: «أه صَلَّيْتَه قَبْلَ مَا أَنْزَلَ...». محاولتش  
أكذب عليها في موضوع الصلاة.. مفيش كذب  
بيستخبي، كان لازم أعرفها إن الصلاة معايا بعافية  
شوية؛ يعني بَصَلِّيْ باستمرار، بس ساعات يفوتني  
فروض، وبِكَسِّلُ لو عدت.. حاولت أفهمها إن الحمد  
لله، الواحد شخصية محترمة جدًا، بس موضوع الالتزام  
بحذافير الدين بالشكل الصح لسة شوية عليه.. يمكن  
لأني لسة معرفش الصح ده، ومحاولتش أعرف، وشايف  
إن اللي أنا فيه كفاية.

وِشْها ابتسم بخجل، وقالت لي: «يمكن إنت مُنْصَرِّ  
شوية في حق ربنا، بس مش كذاب.. صممت تقول  
الحقيقة وماتجملش.. عشان كده، يمكن قَدْرَكْ عند  
ربنا أفضل من ناس كثير».

(صمت)

كَرَّرْتُ سؤاها بخصوص الميول السياسية.. قُلْتُ لها:  
«وَلَا لِيَا دَعْوَةَ بَأْيِ حَاجَةٍ بِتَحْصَلُ فِي الْبَلَدِ.. أَنَا كُلُّ الْيَوْمِ  
بِيَزَعِّلُنِي إِنْ كُلُّ يَوْمٍ نَاسٌ بِتَمُوتُ، وَحَقُّهَا مَا يَبْرَجَعُش».

تترول؛ عشان ربنا يكتب في وئنا القبول.. قلت لها،  
بالنسبة للمغرب: «آه صليت قبل ما أنزل..». محاولتش  
أكذب عليها في موضوع الصلاة.. مفيش كذب  
بيستخبي، كان لازم أعرفها إن الصلاة معايا بعافية  
شوية؛ يعني بصلي باستمرار، بس ساعات يفوتني  
فروض، وبكسل لو عدت.. حاولت أفهمها إن الحمد  
لله، الواحد شخصية محترمة جدًا، بس موضوع الالتزام  
بحذافير الدين بالشكل الصح لسة شوية عليه.. يمكن  
لأني لسة معرفش الصح ده، ومحاولتش أعرف، وشايف  
إن اللي أنا فيه كفاية.

وئها ابتسم بخجل، وقالت لي: «يمكن إنت مقصر  
شوية في حق ربنا، بس مش كذاب.. صممت تقول  
الحقيقة وماتجملش.. عشان كده، يمكن قدرك عند  
ربنا أفضل من ناس كثير».

(صمت)

كررت سؤالها بخصوص الميول السياسية.. قلت لها:  
«ولآ ليا دعوة بأي حاجة بتحصل في البلد.. أنا كل اللي  
بيزعلني إن كل يوم ناس بتموت، وحقها مايرجعش».

فعلًا مش فارق معايًا حاجة في البلد؛ لأننا مش  
فارقين معاها، ومن زمان.. حاولنا نغير، ومفيش حاجة  
اتغيرت.. في الآخر، كل اللي بيسعى لحاجة معينة،  
بيكون عايز من وراها حاجة أكبر.. واللي بيدفع التمن،  
الشعب؛ خاصة الشباب.

قُلت لها إن أفضل حل الفترة الجاية، إن محدش  
بتعصب عشان السياسة أو الوضع، وإن مفيش فائدة  
من أي حاجة بتحصل.. على أذ ما الرد فاجئها، تقريبًا  
قرحها.

رغم إني حسيت إنها بتفكر عكسي تمامًا في الموضوع  
ده؛ لأن من رأيها، المشاركة الفعالة في كل شيء، هي اللي  
هتغير، بس تقريبًا من كُتر التعب والمشاكل اللي بتشوفها  
كل يوم، فهمت معنى كلامي.

خلصنا الكلام .. قامت تيشيل العصير، وهنا أبوها  
انحرك ناحيتنا، وتقريبًا كانوا متفقين إنها لما هتقوم، كده  
هي سألت اللي عايزة تسأله، وعرفت الإجابات.. قعدنا  
شوية كُلنا ندردش في حاجات عامة، وبعد كده استأذنا  
عشان نروح.. أبوها قال لي بنفس الوش البشوش إنه

مفبش حد مَعْرِفَش إِي اتقدّمت للبت اللي بحبها.

بحبها!

هو ده كان رأيهم في كلامي عنها، ووصفي ليها.. كُلُّه  
أجمع إِي بحبها.

بس أنا كده حيت إيه؟

أنا متعاملتش معاها خالص.. حيت فيها إيه؟!

واحد صاحبي سمى الحالة دي (حُب الرُّوح)، وقال  
لي إِي حيت روحها، واللي يعشق الروح، عُمْرُه ما  
ينسى.. عمري ما هقدر أستغنى عنها أو أنساها.

كنت مستني ردهم وأنا بعمل كل حاجة.

عُمري ما استنيت نتيجة حاجة، أو قرار، باللهفة دي..  
طول الوقت مسهّم، باصص للتليفون ومستني يتصل بيّا  
بقولي: «كل شيء نصيب يا بني». على أذ ما كنت بحبها،  
على أذ ما كنت مرعوب.

بعد (٣) أيام عذاب عليًا، لقيت رقم أبوها ظهر على شاشة موبايلي، ومكتوب تحت الرقم (يتصل بك). من كُثر الفرحة معرفتشن أدوس ع الزرار وأرد عليه.

خدت نَفْس عميق.. لبست الزعبوط، وخطبت الساعات في وداني، واتصلت.

أبوها عابز يشوفنا تاني، بتعرّف علينا أكثر.

أنا مفهمتش ده معناه إيه!

روّحت وحكيت لأمي على المكالمة اللي مكملتشن دقيقة، بآبستني وحضتني، وقالت لي: «مبروك يا ضنايا!». أمي تفهم في الحاجات دي أكثر مِنِّي.. فهمت من الكلام إن فيه موافقة مبدئية، والزيارة دي بقى هتكلم في تفاصيل.

قرّرت أجيب لها هدية صغيرة، بعيدًا عن الحاجات اللي بناخذها معانا.

قعدت أفكر، ياترى تكون بتحب إيه!

من فترة عجبتني على الفيس بوك المُصحف المُلوّن.. حسبه مُبهج أوي.



قررت أشتريه ليها، وسواء كانت من نصيبي أو لا،  
نقرأ فيه، وأخذ معاها الثواب.

في البيت عندهم :كان الجو أكثر أريحية.. الوشوش  
مبسوطة بجد.. اطمّنت أول ما قعدنا، والبنت ما زالت  
قاعدة قُدّامي من غير نقاب.. خُفت أسأل في الموضوع  
أحرجهم، أو يطلع يكون فيه حاجة أنا مش فاهمها.

الراجل كان صريح معايا أوي من أول القعدة.. قال  
لي إنه اتكلم مع بنته، وإن فيه موافقة مبدئية، بس حابب  
يعرف بعض التفاصيل اللي هترجّحنا كلنا.

زَي هتُقعد فين، أو سُغلي هيوقرلنا معيشة كويسة،  
ياترى هستنى لما تخلص كلية؟ ولا مستعجل ع الجواز؟  
هسمح لها تكمل سُغل بعد الجواز ولا لا؟

من مضمون الكلام، فهمت حاجة زعّلتني شوية، بس  
فرّجتني.. فرحني طريقة تفكيرها؛ هي شايفة إنها مش  
مُجبرة ترتبط بحد -من وجهة نظرها- مش مُلتزم، بس  
شايفة إن جوّايا حاجة نضيفة ممكن توصل بيّا للمرحلة  
دي. أنا مكنتش فاهم غير إنها عايزاني أحسن، وزَي ما

ابوها قال: «رنا يكرّمكم، وتعينوا بعض في طريقكم للجنة».

كانت الإجابات كلها منطقية. الظروف كلّها مناسبة، وتقريبًا مختلفًا على أي حاجة.

قعدت معها مرّة كهان لوحدنا، نتكلّم بفي في كل حاجة ممكن تخص حياتنا بعدين. قالت بطريقة حادّة شويّة، إن فيه شوية حاجات، عايزة تقول لي عليهم من أول يوم؛ عشان متعشش معايا بعدين.. قالت إنها مش مجبرة عليّا، وإنما شافت فيّا حد كويس، ومُستعدّة بنبي حياتنا سوا ونبي أسرة.

بس أهم حاجة في الحياة هي الحلال والحرام.. عجبتني الفكرة، بس حاولت أفهم منها إيه مقاييس الحلال والحرام.. كنت بجد عايز أقول لها إن بحبها، أو إن مُعجّب بيها من فترة، وجيت أتقدّم لها عشائها هي، مش مُجرّد واحد بيدور على عروسة وحدّ رشحها لي.. سألتني: «عرفتني منين؟ وإيه اللي خلّاك تفكّر تيجي تتقدّم لي؟»، بس مرضتس أجاب.. قلت لها: «في يوم من الأيام، محكيك عن الموضوع بالتفصيل».

كان كلامنا كلّهُ في الحياة بشكل عام، ومكش فيه أي

اختلاف في وجهات النظر خالص .. بالعكس، بدأت  
تكون بشوشة، وقالت إن دي آخر مرة أشرف وشها  
بقي، وبعد كده بالنقاب، لغاية ما نكتب الكتاب.

نعمعم!

مفهميش .. شرجت لي إن اللي حصل ده، اسمه (رؤية  
شرعية)، وإن من حقي أبصر لها براحتي وأركز في  
تفاصيلها؛ عشان ده حقي الشرعي، بس من غير بجاجة  
طبعا.

جمعت كده إن ده طقس ديني، أو حاجة في الشرع  
بتقول كده .. حاولت أفنع أبوها إنها تكون خطوية  
وكتب كتاب، بس رفض؛ لأننا لسة محتاجين نعرف  
بعض أكثر.

انكلمنا في كل التفاصيل، وهما صمموا يكون يوم  
الخطوبة عندهم .. اتفقنا على كل حاجة .. ونزلنا تاني يوم  
عشان نجيب الشبكة والفستان.

فستان!

فستان إزاي بالنقاب؟! المهم، نزلت، أنا وهي وعمتها  
وأمي وأبوها، اختارنا الشبكة .. دورنا كثير، بس  
مالقيناش حاجة تعجبنا فعلاً .. حسيت إن الذهب

مش لايق على الملاك اللي معايا.. اقترخت حاجة، فرقتها  
بسيط عن الذهب اللي ممكن نشتره.

- إيه رأيك تبقى الشبكة عبارة عن دبله و خاتم  
سوليتير؟ خاتم حلو كده؛ بفص ماس صغير شيك،  
بدل زحمة الذهب و خلاص.

عجبتها الفكرة جداً، و بقت متفاعلة معايا في اقتراحتي  
و كلامنا و كده، ده بحضور الجميع.

جينا عند الفستان و وقفنا!

قال إيه، العريس مينفعش يشوف الفستان إلا يوم  
الخطوبة أو الفرح! أنا مينفعش بالهبل ده خالص، بس  
طالما بالنسبة لي مش هيسبب مشكلة، واني حسبته كنوع  
من المفاجأة، عدت!

ما هو مش هعمل مشكلة عشان أخس اختار معاها  
الفستان، اللي أنا عارف إن اختياري هيكون فيه حشمة  
عشان بغير، وهي أصلاً من غير حاجة، هتجيبه بنفس  
المواصفات عشان نقابها!

أموت و أعرف هتلبس نقاب إزاي على الفستان؟!

# قَبْلَ الخُطُوبَةِ بِيَوْمٍ

١١٥

تم تحميل هذا الكتاب من موقع سائر الكتب

[www.sa7raikutub.com](http://www.sa7raikutub.com)

على الرغم من إني مقدرتس أغزيم أصحابي على  
الخطوبة، لكني عرقتهم كلهم بكل حاجة، من أول  
مقابلة ليًا مع أهلها، لميعاد الخطوبة.

فروحولي من قلبهم بجد، ومنهم اللي سفت عليًا؛  
لاني في طريقي إلى شباك الزوجية اللعينة، من وجهة  
نظرهم، بس الأكيد إن كلهم فروحولي، وقرروا نخرج  
قبل الخطوبة بيوم؛ عشان يفرحوا بيًا لوحدهم، بعيدًا  
عن اليوم اللي مش هيعرفوا يحضروه، وفي نفس الوقت  
يدوني الوصايا العشر.

في القهوة، قعدنا كلنا على ترايزة واحدة، بعد  
السلامات والبوس والأحضان، ومبروك، اللي سمعتها  
كثير أوي الفترة دي.

طبعًا كان لازم يخلوني أنهل من بحر معرفتهم في الجواز  
والخطوبة.

بدأ كل واحد فيهم يحكي على فترة خطوبته، مش

عشان يتفشخر بيها قدامنا؛ بس عشان يقول لي نقط  
معيّنة لازم آخذ بالي منها في الخطوبة، أو إني لازم أعملها  
عشان أستمتع بالخطوبة.

أول واحد قال: «أنا يوم خطوبتي، كنت حاجز في  
مطعم محترم أوي وشيك أوي، وبعد ما خلصنا الخطوبة  
والرقص والذي منه، كان المفروض بقى نروح البيت  
نتعشى ونسهر، بس أنا خدتها من القاعة على المطعم..  
هناك بقى كان مُتتهى الرومانسية اللي في الدنيا»..

قَطَعَ كلامه حَدّ من أصحابنا: «قصدك مُتتهى المُحن  
الي في الدنيا، ما تسترجل يا بني وإنت بتتكلم كده،  
أو مال لو مش متجوّز ومعانا في نفس القرف؟!».

ضحكنا كُلّنا على التعليق ده، بس صاحبنا كَمَل:  
«يا عم سيّبي أفنكر الفترة الي كُلّها حلويّات دي..  
المهم، اليوم ده كان يوم فارق في حياتي.. آه كنا بنحب  
بعض قبل الخطوبة، بس مَكْتَبِسْ يَعْرِفْ أَتَكَلَّمْ معاها أو  
المسا.. يومها كانت أول لمسة إيد.. أول بُوسة».

مقاطعة مرّة تانية: «بُوسة إيه يا ابن الهبلّة في مطعم في

الشارع؟ أنت بشرح بيتنا!

أنا من كُتِر الضحك وقعت على الأرض، بس صاحبنا  
كُتِل: «يا عم والله ما بَسْرَح بيك.. التراييزة كانت في  
مكان بعيد، في ركن خالي؛ عشان نبقي براحتنا، وبعدين  
يا عم أنا عرفت آخُد بوسة، إنت زعلان ليه!.. المهم، إن  
اليوم ده عُفْرِي ما نسيته، مَيَقْلُش أهمية عندي عن يوم  
الدُّخْلة».

وكان لسة عايز يحكي عن يوم الفرح والدُّخْلة، قُلت  
له: «يا عم استنى بقى لسهرة الفرح نبقي نقعد نحكي،  
هتقول إيه الله يحرقك!»

كده أنا دوّنت في دماغي حاجة.. عارف لأنّي ولا  
هَبُوس ولا هَنِيْل، بس على الأقل نخرج سوا بعد  
الخطوبة نتعشى برة، بس إزاي بس وهي لابسة نقاب!  
معرّش، بس هي أكيد هتعرف تاكل.

بس حطّبت الموضوع في دماغي عشان مَنَسَّاهوش.

واحد تاني بدأ يتكلّم: «بُص بقى يا بني، سيبك من  
العبيط ده، والهَبَل اللي اتقال، اليوم ده يتلخص في حاجة



واحدة بس! وإنت بترقص سلُو، النور هيطفي، وهتاخذ  
بُوسة عمرك. عايز أقول لك إنك كل مرة هتبوس فيها  
مراتك، هتحاول تكرر أول بُوسة، مش هتعرف من  
حلاوتها.. خاصة لما تبقى مقرب أوي وحاضنها أوي».

أنا كنت قاعد بسمع الكلام زِي العبيط، ولا كأي فاهم  
حاجة.. بس فكرة إِي هرقص معاها سلُو دي، خلّنتي  
طاير من الفرحة.. هو أنا ممكن كده أقرب منها، وأمسها،  
وأحط أيدي عليها؟! قطع حبل أفكاري الحيوان الأخير  
في السُّلة: ابس يا ابن الهيلة منك له.. مطاعم إيه ورقص  
سلُو إيه.. إنت مفكر يا بني فيه بنت هتسيلك نفسها  
تبوسها كده، عشان رقصة حلوة أو أكله حلوة؟! الحل في  
البحر.. إنت تتصرف في عربية وتعمل خطوبتك بالنهار،  
وتهبق بيها على إسكندرية، ساعة بس على البحر.. البحر  
يا بني، حتى لو إنت حيوان، قُدّامه هتجنّ ومش هتقدر  
تقاوم.. وهنابقى تاخذ أول حضن وبوسة، ويبقى البحر  
الشاهد الوحيد على اللي بيحصل».

إبليس مش محتاج يتحرك؟ طالما هُنا قاعدين معايا..  
كمية البوس والأحضان، الموجودة في الكلام، كفيّلة إننا

يتأخذ آداب.

كنت قاعد مركز في كل كلمة بتقال، بس مش فاهم  
إيه اللي المفروض أعمله بكرة.

خذت منهم النصايح، اللي لو عملت (١) من (١٠)  
منها، هيحصل حاجة من الاتنين؛ يا هتأخذ آداب، يا  
هيرجموني وأنا صاحي.

أنا لسة هستري البدلة. بس عايز أجيب الكرافاتة  
نفس لون الفستان.

اتصدمت إني تمعّيش رقم تليفونها.. أنا مطلبتوش،  
وهي محاولتش حتى تأخذ رقمي.. كلّمت أبوها أطمّن  
عليها، وطلبت منه بديها لي أسلم عليها وأسألها على كام  
حاجة.

سألتها: «إزاي أنا مش معايا رقمك؟!»

قالت لي: «عادي، سواء رقمي أو رقم بابا، كده كده  
هرّد وأنا قاعدة جنبه.. المهم خير؟»

قلت لها إني رايح أجيب البدلة، وبها إني مشوفتش  
الفستان، فعايز أعرف لونه بس عشان أظبط الكرافات

عليها.. كنت بقول الكلام، وأنا سامع صوت نفسها  
بيغلى في التليفون.

معقول هي مبسوطه إنها هتخطب ليًا؟

معقولة ممكن تكون حاسّة أنا بحبها أذيه؟

مع الأيام، هتعرف إني بحبها، وإني ماقدرش أعيش  
من غيرها. مع الأيام، هتعرف أنا ضحيت بإيه وبأحلام  
أذيه؛ عشان أكمل حياتي معاها.. مع الأيام، هتعرف  
إني مستعد أتغير ليها وعشائها.  
ويبس.

اشتريت البدلة.. وروّحت خلّقت وظبطت نفسي،  
وفضلت سهران في البلكونة زي اللي حاسس إن بكرة  
العيد.. مش عارف أنهي عيد بالظبط! ولا عارف العيد  
ده هيمشي إزاي ولا بأنهى ترتيب!  
افتكرت حاجة مهمة جدًا!

نزلت بسرعة أحجز في أحسن مطعم قريب من بيتهم؛  
عشان بعد الخطوبة نخرج نتعشى برة.. حاولت أختار  
مكان التراييزة زي ما صاحبي قال بالظبط، في مكان

بعيد وهادي من المطعم.

كنت محتاج أتصل أسمع صوتها أوي في الوقت ده..  
محتاج أقول لها إني بحبها أوي، بس مكانش يتفع.. قلت  
بكرة بقى أقول لها كل حاجة، وأنا بلبسها شبكتها كده،  
وهي قريبة مني، أكيد هيكون أحسن وأجمل.

سمعت صوت الفجر وأنا مروّح، لقيت نفسي -لا  
إرادتي- رابع أصلي، قبل ما أروح أنام لي شوية، قبل  
اليوم الطويل اللي هيكون من أجمل أيام حياتي، أنا متأكد  
كفاية إني هضّمها بكرة، ونرفُضُ سوا، وأقدر أقول لها في  
ودنها كده إني بحبها.

# يوم الخطوبة

١٢٥

تم تحميل هذا الكتاب من موقع ساجر الكتب

[www.sa7eralkutub.com](http://www.sa7eralkutub.com)

كان موجود في البيت قرايب القريين مِنَّا أوي،  
 وبست الكل أمي، وحمايا، وتقريباً قرايبه بَرُّضه.. أول ما  
 دَخَلْتُ، فِضِلْتُ أدور بعينياً على العروسة، مش لاقبها..  
 حمايا خدني من إيدي، وبدأ يعرفني على العيلة كُلِّها،  
 فلان خال العروسة، وفلان عم العروسة، وفلان ابن  
 خال أم عمّة العروسة.. وفجأة، لقيت الناس بتنقسم لا  
 إرادى لركنين في الضالة، وبينهم ستارة بتفتح وتغفل  
 على حسب المزاج، ضالة فيها الرجالة وأنا معاهم،  
 وأمى اختفت جوه مع الستات بدأت أقلق الصراحة،  
 مش فاهم حاجة!

أنا كنت مُتوقّع إنى هروح، ألقى أغاني محمود الليثي  
 شغالة بقى، وناس بتهبص عشان فيه خطوبة.. روحت  
 لقيت الناس قاعدين يشربوا حاجة ساقعة، ومفيش غير  
 أغاني غربية شغالة.

بس إشطة بعني، الجو غريب ولذبيذ في نفس الوقت،  
وتقريبًا كده، الحب بيخلي الواحد يستوعب الصدمات  
بدري وبتاع. بس كله جهون في إني هشوف القمر.

فجأة الستارة اللي بين الستات والرجال اتفتحت، ظهر  
القمر في عز النهار، قاعد في نص الستات وأمي جنبها..  
هايا أأخدي ودخلنا عندهم، قعدت أمي في النص، وأنا  
وهي جنبها، كل واحد في ناحية.. لابسة النقاب على  
الفتان، وكنت مبسوط أوي، بس مستغرب شوية من  
الوضع.

أغاني غريبة، مش فاهم منها أي حاجة، ولا حرّكت  
جوايا أي حاجة، بس شايفها متفاعلة معايا. نقاب في  
الخطوبة على الفتان، بس كنت متخيل مثلاً إنها هتقلعه  
لما تكون لوحدينا، بعيد عن الرجال، بس ده محصلش.  
أنا مستني اللحظة اللي هيكون فيها مزيكنا، ونقوم  
نرقص سوا، بس تقريبًا ده كُله بلع، مفيش الكلام ده.  
قلت إشطة بقى، كل اللي عايز أقوله، هقوله وأنا بلبسها  
الدبلة.. هقول لها إني بحبها، وده كفاية، وإن شاء الله  
نخلي أي حاجة تانية بقى لما نتجوز.

بس إشطة بعني، الجو غريب ولذيد في نفس الوقت،  
وتقريباً كده، الحب بيخلى الواحد يستوعب الصدمات  
بدري ويتاع. بس كله يهون في إني هشوف القمر.

فجأة الستارة اللي بين الستات والرجال اتفتحت، ظهر  
القمر في عز النهار، قاعد في نص الستات وأمي جنبها..  
حمايا أخذني ودخلنا عندهم، قعدت أمي في النص، وأنا  
وهي جنبها، كل واحد في ناحية.. لابسة النقاب على  
الفتان، وكنت مبسوط أوي، بس مستغرب شوية من  
الوضع.

أغاني غريبة، مش فاهم منها أي حاجة، ولا حرّكت  
جوايا أي حاجة، بس شايفها متفاعلة معايا. نقاب في  
الخطوبة على الفتان، بس كنت متخيل مثلاً إنها هتقلعه  
لما تكون لوحدينا، بعيد عن الرجال، بس ده محصلش.  
أنا مستني اللحظة اللي هيكون فيها مزبكا، ونقوم  
نرقص سواء بس تقريباً ده كُله بلع، مفيش الكلام ده.  
قلت إشطة بقى، كل اللي عايز أقوله، هقولُه وأنا بلبسها  
الدبلة.. هقول لها إني بحبها، وده كفاية، وإن شاء الله  
نخلي أي حاجة تانية بقى لما نتجوّز.



من أول ما قعدت معاهم جوء، وأمي قاعدة في النص  
بيننا، وطلبت عليها أكثر من مرة، تقوم، قالت لي ميتعش  
ودي رغبة العروسة. أخيراً، أمي قالت لي الكبيرة بقى  
هي اللي هتلبسها الذبلة!

الموضوع كان صعب جداً بالنسبة لي، يعني إيه ١٩ هي  
دي خطوبة ولا تهريج ١٩ أنا مش شايف أي مزايم  
خطوبة في الموضوع.. أنا لازم أفهم وأتكلم معاها في  
الموضوع، بس مقلتش إنه هينفع هنا قدام الناس.. كان  
الحل إيه؟

يا إما أتكلم ويحصل توتر في الموضوع، وأنا أكيد مش  
حابب ده يحصل.

يا إما امتي لما اليوم يخلص باي شكل، وبعدين  
نتكلم.

وأنا طبعاً عشان بحبها، عملت بالرأي الثاني.. استيت  
اليوم يخلص، وبعدين نتكلم براحتنا.

فجأة لقيت بنات لابسين زي أبيض، وكل واحدة  
ماسكة ذف ويعملوا صوت حلوا، وهنا أمي طلعت

الدَّبَلَةُ والخَاتَمُ، وبدأت تلبسهم للعروسة، وبدأت  
السُّتَات تزغرت، وحمايا باشي وحَضَنِي، وقال لي  
مبروك

كنت عايز أقول له والله: «أنا فعلاً عايز حَضَن، بس  
مش منك يعني»، لكن مقديرتش.. أنا كنت محتاج فعلاً  
أتكلم عن اليوم ده، معاها، من قبله، بس أنا توقعت إنه  
زي أي خطوبة سُفنتها قبل كده.

بس يلاً، الحمد لله إنها كانت ميسوطة.. ده كان باين  
جداً من ردودها علياً وتفاعُلها مع أمي والبنات..  
بصراحة، مقديرتش أمسك نفسي، وروحت سألت أبوها  
عن اللي بيحصل.

قال:

- الخطوبة وعد بالجواز يا بني، يعني لسة مفيش بينكم  
أي عقد قران بقول إنها مراتك، قبل العقد  
ده، هي بالنسبة لك غريبة وإنك بالنسبة لها غريب،  
يعني مينفعش تشوفها، ولا تلمسها عشان  
تلبسها الدبلة وما إلى ذلك.

- بس دي خطيبي، والمفروض متبقى مرالي قريب.

- لما نكون مرانك، إبقى اعمل اللي إنت عايزه.  
متكون حلالك، إنها دلوقتي ميفعش أصلاً  
تشوفها، طالما ارتضيت بيها وهي متقبلة.

- راضي والله يا عمي، بس الموضوع كده صعب  
أوي.. يعني ولا حاسس إن في خطوية.

ضحك بوشه البشوش دايمًا، وقال: «يا بني أنا كنت  
زيك كده بالظبط من (٢٧) سنة، وأنا رابع أنقدم  
لزوجتي، الله يرحمها، بس صدقتي، الحب بيحلبنا  
تعدي، وننطبع بطباع اللي بنحبهم، ويتفاجئ في الآخر  
بمنعة كبيرة؛ لما تعرف إنك تعلمت بالطباع الصّح.. إنت  
فاهم إن مش واخد بالي إنك بنحبها؟ ليس فيه فرق إنك  
بنحبها، وإنك بنفع تقول لها إنك بنحبها.. حافظ على  
الحلال بينكم؛ عشان ربنا يسعدك..»

كان الكلام حلوا، بس الوضع غريب، ومش عارف  
أعمل إيه.. آخر واحد كنت مستي أسمع منه الكلام ده  
هو حمايا. كنت مستي منها هي إنها تقول لي إنها واخدة  
بالها كويس جدًا من إن بنحبها.

روح فعدت ثاني معاهم، وكنت بتكلم معاهم في  
وجود أمي بيننا.

- مبروك يا عروسة.

- الله يبارك فيك يارب.

- مبسوطة بالشبكة؟

- جدًا.. ربنا يبارك لي فيك يارب.

على أذما الدعوة بسيطة، بس فرّجت قلبي أوي.. قلت  
لها إني اتكلمت مع أبوها في الحاجات اللي استغربتها،  
بس حبيت بقى أقول لها على المفاجأة: «أنا حجزت لينا  
في مطعم كويس؛ عشان بعد الخطوبة نخرج نتعشى  
سوا».

ضحكت، وقالت بمُنتهى البساطة إنه مينفعش نخرج  
سوا لوحدنا.. الأحسن نتعشى هنا، في وجود أهلنا،  
أحسن من إننا نخرج برّة وناخد حدّ معانا، وفي الآخر  
زي ماتحب.

زي ما أحب إيه!

أنا عايز أخرج معاهم لوحدنا.. آخذ حدّ معايا ليه؟

أَقُلْتُ لَفَيْتَ الْحَجْرَ، بَعْدَ مَا هِيَ أَفْنَعْتِي إِنَّا مَعَكُمْ  
تَقَعْدُ هُنَا وَتَنْبِطُ، وَإِنْ أَبَوْهَا فَعَلًا حَبْنِي، وَيَكُونُ  
بِسُوطِ وَإِحْنًا قَاعِدِينَ جَنْبِهِ.

اليوم بيخلص.. سلّمت على الناس كلّها، وفضّل في  
البيت أنا وأمي وعمروستي وأبوها وأخته.. وأنا من اليوم  
ده، وكل تفكيري في كُتُب الكتاب؛ لأنّي بصراحة مش  
مقدّر أستحمل العُقْد والكلاكيع دي.. مش معرّف  
أنا أتعامل معاها على إنها غريبة، أنا جيت أتقدّم لها  
وأخطبها؛ عشان تقرب، مش نبعد ونبقى أغراب عن  
بعض!

محتاج لما أخرج معاها، أكون لوحدي، أتكلّم معاها  
براحني، بس من اللي فهمته، إن ده مينفعش، طول ما هي  
مش مراتي.

خلاص، تبقى مراتي.

اتعشينا سوا لوحدينا، بس قُدّامهم، وبنت اللدنية  
بتأكل بالنقاب عادي جدًا.. أنا قلت أستعبط وأقول لها  
تقلع النقاب؛ عشان تعرف تأكل، بس ما شاء الله كانت  
بتأكل زي الفل.

كلنا وفعدنا كُلْنَا.. ضحكنا كبير.. فجأة، كل الفيود  
اللي شايقها من الصبح، لقبها بزوج؛ نُصَاد ضحكة  
واحدة منها. قالت لي إن كل التوتّر والقلق ده هيروح،  
أول ما تكون حلال لبعض.

### فِيسْتِي!

اليوم خلص.. أخذت رقمها وخديت رقمي..  
اتفقنا إني مزورها كمان كام يوم في البيت. أبوها كان  
مرحّب جدًّا، وقبل ما أنزل وأبدأ حياة جديدة فيها  
بنت بمواصفات غريبة بالنسبة لي، قامت دَخَلت جوّه،  
ورجعت بكشكولين!

إدبتي واحد، وقالت لي إنها واخدة بالها من كل حاجة،  
ومن مشاعري ناحيتها، وعشان مقولش حاجة مش في  
وقتها، أخذ الكشكول ده، وكل ما أحس ناحيتها بحاجة  
أكتبها، وكل ما أحب أقول لها حاجة أكتبها، ويوم كتب  
الكتاب نبذل الكشاكيل، وكل واحد بقى بقرا اللي الثاني  
كتبه.

بصراحة عقلي مش متوعب كل اللي بيحصل ده.  
والأغرب إني ماشي ورا الكلام كأنه قرآن، ومبغتر ضش

على حاجة.

كل ده، عشان أشوفها مبسوطه ومرتاحة في التعامل  
معها، مع إني فعلياً مش مرتاح بالشكل ده، ومحتاج إن  
العلاقة تكون بشكلها الطبيعي؛ اللي هو اتنين يحبوا  
بعض، فيعترفوا بده لبعض، في أي وقت وأي مكان..  
عُمرِي ما كنت مُتوقِّعُ إني أستسي وقت مناسب عشان  
أقول اللي حاشه.

بس فعلاً، الحب بيخليك تعمل حاجات كبير، إنت  
مش مُقتنع بيها عشان اللي بتحبه.

ومن هنا بدأت الخطوبة.. بس مكُتِش مُتوقِّعُ أبداً إني  
بقِي (خاطِبُ بس بدرَجَة سِنْجِل)!

ساحر الكتب  
www.sa7erakutub.com

يا فرحة تَمَّت في أقرب  
مكان في العالم

١٣٧

تم تحميل هذا الكتاب من موقع ساحر الكتب

[www.sa7erakutub.com](http://www.sa7erakutub.com)



رغم إني عارف حاجات كثير عنها، بس كان لازم  
نعرف بعض أكثر، ونتعرف على بعض أكثر.. نعرف  
صفات بعض بالتفصيل؛ عشان يمكن فيه حاجات  
تغرفهاش، ولازم أكون على علم بيها. الكلام كان بيننا  
قليل جدًا، ويزيد مع كل مرة، وطبعًا في وجود باباها  
جنبها، وساعات كان بياخد الموبايل منها يكلمني، أو  
يسلم عليًا، وهكذا..

مكتيش عارف آخذ راحتي في الكلام معاها.. وكنت  
كل ما بيان في صوتي إني متضايق أو حاجة، كانت تفكرني  
بالكشكول؛ لأنها عارفة كويس إني متضايق من إني مش  
عارف أقول لها اللي جوايا.. موضوع الكشكول ده كان  
حل سخيف جدًا، يعني إيه كل ما توحشني أكتب إنها  
وحشتي؟! كل ما يبقى نفسي أحضنها، أكتب ده! طب  
والكلام ده هيتحقق إمتي؟ هجسه إمتي؟!

بدأت الزيارات تكثر بالتبادل؛ عندنا أو عندهم،  
وكان كلامنا وكل حاجة دايما في وجود حد من أهلها..

بعد (١٠) أيام من الخطوبة، كنت بفتاح أبوها في كتب  
الكتاب.

ماهو أنا مش معرف الصراحة كل ما أعوز أقول لها  
حاجة أكتبها، ساعات بتكون فيه حاجات عادية أصلاً،  
ويخاف لتكون مَنفَعش، أو غلط، أو حرام!

فكرة إني مش على دراية بالموضوع ده أوي، كان  
موثري جداً، ودايماً بفكر في كل كلمة (١٠٠) مرّة قبل  
ما أقولها.. أمي كانت دايماً تضحك، وتقول لي أهى دي  
اللي هتريكي من أول وجديد!

كنت متضايق.. أه.

بس زَيّ ما يقولوا: «عل قلبي زَيّ العسل»، بس لو  
الموضوع استمر بالشكل ده، هنسب بعض لا محالة!  
لأنّ مش مستوعب يعني إيه أبني عايز أتكلّم معاها في  
حياتنا ونفاصيل عيشتنا، أو احتياجاتي، والاقبي إن الرد  
على كلامي «مش وقته»، أو «بعدين»!

أبوها الصراحة كان مقدر كلامي معاه جداً في موضوع  
كتب الكتاب، ومش مُعترض، وقال لي أتكلّم معاها

وشرف رأيها إيه في الموضوع.. هو نبهني بس إنه حاب  
ياجله شوية؛ لسبين:

١- إن كل واحد فينا بتأكد من مشاعره ناحية الثاني،  
واننا فعلاً نكون عايزين نكمل مع بعض.

٢- إنها تكون خلّصت آخر ترم في الدراسة؛ عشان  
تفضالي بقى.

أبوها بقى صاحبي من كُتر ما هو حاسس بيّا، وضّحلي  
سبب ده؛ لأنه مر بنفس التجربة والمرحلة دي مع أمها  
من سنين، ودلوقتي ما شاء الله عليه، راجل بشوش  
وطيب.

اتكلّمت معاها في الموضوع، وكان رأيها زّي رأي  
أبوها، هي معندهاش مانع، بس نستنى بعد الترم؛ عشان  
تبقى قاضية ليّا.. هنا كنت حاسس إنها واحشاني أوي.

- وحشتيني..

قُلْتها بعد ما كنت كاتبها كتير أوي، قُلْتها وأنا صوتي  
يقول لها متر عlish إنّي قُلْت.

كان ممكن تتترفز عليّا.. كان ممكن تزعل مِنّي

وتعصني.. كان ممكن تفقل السكة، بس معمولتش ده!  
عارفة إني بني آدم، وعندني مشاعر، ومش في قوتها في  
الصبر.. ضحكت، وقالت: «أتق الله».. كانت ضحكها  
بنقول لي: «متخافش! أنا عارفة إنه غصب عنك،  
وقريب منك سوا». وأتق الله كانت بتفكرني برينا،  
اللي أنا شايف إن كلمة «وحشتيني» أو «بجبتك» لما أكون  
حاسسها، إنها عُمُرُها ما هترَعْلُه، بس هي قالت إن رينا  
هيزعل من ده! لأن ده مش وقته.

كنت عامل زي العجل الصغير، اللي مامته بتعلمه  
الصح من الغلط، وكنت بتقبل الكلام ده بحُب، زي  
حُب أي طفل صغير لمامته.

استمرت الحياة بالشكل ده، كل موقف يمر علينا،  
نكتبه.

كل حاجة وكل كلمة تخرج مني، غصب عني، تعرّفني  
إنه مش وقتها.

بدأت أخلص الشقة؛ عشان بعد ما تخلص الترم نكتب  
الكتاب ونتجاوز على طول.

كنت دايماً تجسّ بالاهمال.. وعدم الاهتمام.

أو إنها مبتحبيش؟ بسبب إنها عقرها ما فرجت قلبي  
بكلمة زي «بحبك» من قلبها، أو «وحشتي».

معرش دي حقيقة، ولا هي فعلاً بتحبي وشجاهد  
نفسها، عشان زِي ما بتقول دايماً، إنها بتتقي ربنا قياً،  
عشان ربنا ميعاقبناش في بعض.

فبصت أحاول أتحمل العلاقة الغريبة دي.

بحب من غير ما أحب بجد، أو أبين إني بحب، ولا  
أقول إني بحب.

طول الوقت حاسس إنها وحشاني، ومش قادر أقول.  
وسبب إنها مبتكلمش دايماً، حاسس إنها مش  
موجودة.

فبين الخطوبة هنا؟

هو أنا كده خاطب؟! أنا لو كنت فضلت زِي ما أنا،  
كان أفضل بالنسبة لي، إنها ده اسمع إيه؟

كان لازم نقعد ونتكلم في الموضوع ده، نخطب  
حد.. يا تفهمني إيه المطلوب مِنِّي، والمفروض أستي  
لغاية إمتي، يا إمّا كل واحد يروح من طريق.

بس أنا ما صدقت لقيتها، ومش هقدر أستغنى عنها.  
اتصلت بيها، واتفقت معاها إني هزورهم بكرة، وإني  
عايزها في موضوع مهم.

قبل الميعاد كنت هناك.. سلمت على والدها وقعدت  
معاها شوية، وبعدين قعدت معاها بعيد عنه شوية، بس  
قدامه برضه وشايفنا.

(صمت)

أنا ساكت لأنى على آخرى، مش قادر أستحمل الوضع  
ده أكثر من كده.. أنا محتاج أحس باحتواء، أو حُب زى  
ما أنا عايز.. أنا جاي أنجوز، مش جاي أتعذب!

مش شايف منها غير عينيها اللي بحس فيهم براحة،  
بس دايماً بتبعد عينيها عني، عشان معرفش أبص فيهم.  
حتى دي مش عارف أبص ليها..

(صمت)

فجأة قلت لها:

- أنا مش قادر أتحمّل الوضع ده.

- وضع إيه؟

- وضع إني مش عارف أتكلّم معاكمي أو أخرج معاكمي، مش عارف أقول لِك على اللي جَوّابا.

- طَبّ فين الكشكول؟

- أنا مش هَقْضِي فترة الحَلْطوية بكتب في كشكول، ما كنت خطبت الكشكول أحسن.

ضِحْكِي، وأبوها جه شاركنا الكلام، وقال: «أنا عارف يا بني إن الوضع ده صعب عليك، بس لما تعرف الحدود والضوابط دي كويس، هترتاح، وبعدين هانت .. كُلُّها شهر وتكتبوا الكتاب.

- طَبّ وإيه هي الحدود والضوابط دي؟

- وضع إني مش عارف أنكلم معاكى أو أخرج معاكى، مش عارف أقول لك على اللي جوايا.

- طَبْ فين الكشكول؟

- أنا مش هَقْضِي فترة الخطوبة بكتب في كشكول، ما كنت خطبت الكشكول أحسن .

صِحْكِي، وأبوها جه شاركنا الكلام، وقال: «أنا عارف يا بني إن الوضع ده صعب عليك، بس لما تعرف الحدود والضوابط دي كويس، هترتاح، وبعدين هانت .. كُلُّهَا شهر وتكتبوا الكتاب.

- طَبْ وإيه هي الحدود والضوابط دي؟



# ضوابط

## «الخطبة ما هي إلا وعد بالزواج»

يعني هي وعد من الخاطب للعروسة بالجواز.. يعني مفيش بينهم أي عقد، يعني لا يجوز ولا يحل لك إنك تقعد معايا لو حدنا، أو حتى إننا نتكلم بشكل فيه أي نوع من المياعة أو المشاعر. ده لا يجوز.. D:

مش من حقت تشوف مني ما يرى الزوج والمحارم؛ لأنك لسة خطيبي، مش أكثر.

«وعد»، يعني ممكن توفى الوعد ده، وربما تتخلي عنه لأي سبب من الأسباب.

مش جايز يحصل بيننا خلاف؟، وربما ميكونش بيننا وفاق، فلازم يكون فيه حدود واحتياط؛ لغاية ما ربنا يريد وأكون حلالك وتكون حلالتي.

من حقت تظمن إنك اخترت صح، من خلال إنك تقعد معايا ونتكلم، بس كل ده في وجود أهلي ومحارمي، والدليل على ذلك:

«جاء رجل الى النبي - صَلَّى اللهُ عَلَيْهِ وَسَلَّمَ - وهو  
المعترُّ بن شعبة - رَضِيَ اللهُ عَنْهُ -، وأخبره بأنه خطب  
امراً، فقال له النبي - صَلَّى اللهُ عَلَيْهِ وَسَلَّمَ -:

«انظر إليها؛ فإنه أحرى أن يؤدم بينكما».

وفي حديث آخر، قال - صَلَّى اللهُ عَلَيْهِ وَسَلَّمَ -:

«إذا خطب أحدكم المرأة - أي عزمَ خطبتها - فإن  
استطاع أن ينظرَ إلى ما بدعوه إلى نكاحها، فليفعل».

ودأ مش من حقت إنت بس، دا من رحمة وعدل ربنا،  
دا من حقي أنا كمان إني أشوف مِنك ما يبرِّعني في الإقدام  
على الزواج منك.

والإسلام شرع هذه الرؤية وهذا النظر؛ عشان كل  
واحد يشوف اللي في الثاني من مميزات وعيوب، مع  
إنه، كما قال، أو كما جاء في الأثر، لستُ مُتذكِّرة: «كلُّ  
خاطبٍ كاذبٍ»، وهذا لا يعني الكذبَ بعينه، ولكنه  
يعني النجملُ في الحديث.

أنا وإنت هتشارك الحياة دي بكل ما فيها؛ فلابد كل  
واحد فينا يكون فاهم الثاني؛ عشان محدش فينا يندم على  
القرار ده.

- الخطوبة، مینفمش نحلل اللي ربنا حرّمه، او نحرّم  
الحلال.

- الخطوبة، مینفمش فيها إنك دايمًا تكون عايز كلامك  
هو اللي يمشي؛ لأن لسة في بيت بابا: D

- مش مُضطر تصرف عليًا، ومَلَكش عندي أي  
حقوق؛ لأننا لسة أغراب عن بعض.

- الخطوبة مش جواز؛ لأن الركن الأساسي في العقد  
(عقد الزواج) الإيجاب والقبول.

والقبول ألفاظ معهودة ومعروفة في العرف والشرع،  
وما دام هذا العقد بإيجابه وقبوله لسة متحققش كله،  
فالزواج لم يحدث أيضًا، ونظل المخطوبة أجنبية عن  
خطيبها؛ أي لا تحلُّ الخلوة أو السفر، دون وجود أحد  
محارمها.

طبعًا الكلام ده كُلُّه سليم، بس أنا مش مرتاح..  
حاسس إنني في درس دين، ومش مستوعب الكلام..  
عارف إن عندها حق، بس أنا برضه بنبي آدم، ومن حتي  
أعيش يومين الخطوبة.

أبوها كمل وقال:

«فالمفروض يا بني، كل خاطب يظبط نفسه، ويجمع  
عواطفه، وما يبصرُ حش بيها؛ لغاية ما يكتب الكتاب؛  
عشان «لا خير في أمر يتجاوزُ الحلال إلى الحرام».

فالموقوف على حدود الله أحق وأولى.

فلا بُدَّ من «سبغنا وأطفئنا».

ورينا قال يا بني :

«وَمَنْ يُطِيعِ اللَّهَ وَرَسُولَهُ وَيَحْشِ اللَّهَ وَيَتَّقِهِ فَأُولَئِكَ هُمُ  
الْمُفْلِحُونَ».. «النور (٥٢)».

عشش بنفسي غير وأنا بقوله: «ونعم بالله يا عمي».

أنا مش مُفتتح أوي بالكلام ده، بس حاشه.. وخُبي  
ليها تخليني عايز أعمل أي حاجة عشان أسعددها وتكون  
حياتنا أحل.

بيني وبين نفسي، قررت إني أتعامل معاها كأننا لسة  
متخطبناش، وكأنها غريبة عني فعلاً، مش قريبة مني  
ورحبها كده.. كلام في أي حاجة عامة قُدام أهلها وبس.  
ولما بنفى نكتب الكتاب - إن شاء الله - بنفى نصريح

بقي بكل حاجة.. بس ربنا يستر ومفيس مشاعر تموت  
في الشهر، ده لغاية ما أكتب الكتاب.

فُقت على صوت حايا، وهو بيقول لي: «يلاً بقي ناكل  
السك اللي عاملا هولك مخصوص، وأنا عاملك سلطة  
ناكل صوابك وراها».. بصيت له وضجكت.. الراجل  
ده أنا حاشه شبيهي أوي، وكان في يوم من الأيام هتحول  
وابقي زيّه بالطبط كده.

ربنا يستر .

# حُبُّ مَشِ تَعُوذُ

١٥٥

كل حاجة في أولها صعبة.

العَيْل الصغير، لما يبدأ يتعلم المشي، بيقع ويتكعبل، لغاية ما يمشي ويجري كمان.

نفس الوضع في كل حاجة، كل حاجة في أولها بتكون صعبة شوية، بس الإصرار والحب بيخلي عندك عزيمة إنك تعمل أي حاجة عشان اللي بتحبه.

بعد كل التعليقات دي، اللي هي أصلاً مش تعليقات، وعبارة عن شرع وحلال وحرام، اللي عُمرِي ما فكَّرت، ولا مرَّة، إني أدور فيه أو أقرأ فيه، فهمت ليه الالتزام صعب أوي كده.

لما كنت أسأل، دايمًا كانت تقول: «الجنة تستاهل».

بدأت أعمل الحاجات دي بحُب.. عشان أقدر أكمل بيها، وأنتقل من مرحلة الحب ليها إلى الإدمان.. إدمان الطاعة والقرب من ربنا.



ربنا اللي خلقها لينا وخلقني ليها.. بس كل حاجة  
بميعاد.

يعني مينفعش آخذ حاجة منها قبل ميعادها.

رغم إني، في بداية الأمر، كنت عامل زَيّ اللي  
بيحارب، وشايل حمل ثقيل أوي على ظهره، بس مع  
الوقت ابتديت أتعود عليه، وأحس إني مش قادر أكمل  
من غيره.

طبيعة كلامنا كانت دايماً في حاجات ليها علاقة بشكل  
حياتنا، والشقة وتفاصيلها، مش أكثر..

بدأت أحب الكشكول أوي؛ لأنني بعيش معاه أكبر  
علاقة ممكن أعيشها الفترة دي.

علاقة التدوين.. كنت بدون وأسجل فيه كل حاجة  
عايز أقولهاها.

مبسوط النهاردة؛ لأنني مثلاً سُفتها، كنت أكتب ده في  
الكشكول.

زعلان؛ لأن حصل ظروف ومعرفتش أشوفها، كنت  
أكتب ده في الكشكول.

مكدبش، ساعات بثور وأنفعل؛ لأن الموضوع ده  
متعب جدًا، متعب إني أسيطر على مشاعري.. إزاي  
أكون بيصلها، ومش قادر أشبع منها، أو أقول لها كلمة  
حلوة، أو حاجة حاسسها؟!!

بدأت الأيام تعدني، يوم ورا الثاني، لغاية ما صعوبة  
وقساوة الموقف بدأت تلين.

بقيت حاسس إن كل حاجة هتكون تمام.. كل حاجة  
هتبقى قل.

انشغلت في الشقة أكثر.. وفي شغلي أكثر وأكثر، وبقيت  
أقلل من كلامي معاها، كل ما مشاعري تزيد.. لو  
حاسس إني مش هقدر أسيطر على نفسي، كنت مرووحش  
أزورها زي ما معودها. كانت فاهمة ده ومقدرأه جدًا.

زهقت أصحابي في عيشتهم، كل شوية أخش لحد  
منهم في الشات، وأرميله الجملة دي: «أنا بحبها أوي  
وعايز أتجوزها بقى».. كانوا يضحكوا، لأنهم عُمَرُّهم ما  
تخيلوا إن ممكن في يوم أنا أحب بالشكل ده، أو أتعامل  
بالطريقة دي. بحبها، يعني مرووح أقول لها بحبها، مش

أكرم في قلبي أو في ورق الكشكول، الشهر بخلص..  
كل حاجة بتقرب.. وهي بتحلو يوم عن الثاني.. كل  
حاجة فيها بحثها بقت أحل.. عيني شايفها أحسن  
واحدة في الوجود.. هي ويس، وكل حاجة في الكون  
إضافات .

قالت لي حاجة، عشرينهاش بتحصل معايا، غير لما فعلاً  
بقيت أحب كل حاجة صح بتحصل بيتا.. اقرب من  
ربنا خطوة، يقرب منك كثير.

الحمد لله، بدأت كل حاجة في حياتي تتعدل؛ شغلي  
وحياتي وعلاقتي بأصحابي، كل ده بقي أحسن لما  
علاقتي مع ربنا بقت أحسن.

بدأت تنبهي دايماً للصلاة.. بورق صغير، تقول لي  
حلبه دايماً في جيبيك، أو انها تقول لي اكتب على إيدك  
دايماً حاجة تفكرك بالصلاة، بإنها تبعتلي رسالة ساعة كل  
صلاة عشان أصلي، تتصل تصحني ماما عشان تصحيني  
للفجر.. فجأة، حسيت إن أنا كنت عايش في حياة  
رمادية، ويتور بقى من جديد.

أمي كانت طائرة ييها، لأنها شايقة التغيير اللي يحصل  
كل يوم.

أمي، لما كنت أثور وأزعق، وأقول إني مش عارف  
أتعامل معاها، وإنما بترييني من أول وجديد، كانت  
تجني في صفها ضدي.

أمي حَبَّتْها زي ما أنا حَبَّتْها بالقطب.

حَبَّتْها، لأنها بقت لبًا - قبل البداية - سَنَدٌ وضهر..  
أومال لما نكون سوا، هتبقى لبًا إيه؟

ساحر الكتب  
www.sa7eralkutub.com

# يوم كتب الكتاب

تم تحميل هذا الكتاب من موقع ساهر الكتب

[www.sa7eralkutub.com](http://www.sa7eralkutub.com)

# يوم كتب الكتاب

تم تحميل هذا الكتاب من موقع ساهر الكتب

[www.sa7erakutub.com](http://www.sa7erakutub.com)

النهاردة، أقدر أقول إنه أهم يوم في الحياة كلها.  
لما سُفنتها النهاردة من غير نقاب، كنت كأني بشوفها  
لأول مرة.

لما ميكت إيديها، كنت بقول لنفسي، بصوت عالي،  
قُدَامها، إن دي حقيقة مش حلم.

فبصت مصدوم شوية؛ أول ما قلعت النقاب قُدَامي،  
وكانت ملاعبي من الصدمة غريبة.. بان إني مش فرحان،  
وده زعلها، بس الحقيقة كانت غير كده، أنا من الصدمة  
تُحِت، بس من جوّه كنت فرحان جدًّا، فرحان إن  
خلاص بفي من حفي أشوفها وأبصلها وأشبع منها..  
خلاص بقت مراقي.

آه عارف إن فيه حاجات ميصحّش تحصل، وأكيد  
بغني مش هعمل حاجة، بس الفكرة إن خلاص، كل  
العُقْد اللي كانت محطوطة اتفكّت، هعرف أقول لها كل  
اللي في نفسي، بدل ما أكتب لها «وحشتيني» في الكشكول

بالوقت والتاريخ، هقول لها بكل بساطة «وحشتيني»  
كان فيه حاجة كنت هموت عليها، ويرضه لسة مش  
عارف تنفع ولا متنفعش؛ هو أنا ينفع أحضنها؟ أشم  
ربحتها من قريب؟ أتفسها؟!

كانت شابفة في عينيا حُب الدنيا والدين، كانت حاسة  
بنبض قلبي، كنت بتابع كل حركاتها وكلامها، كاني لسة  
أول مرة أشوفها.

اليوم عدى وخلص.. وكان لازم نخرج سواء،  
لوحدينا، أبداً أعيش بقى فترة الخطوبة، بس بعد كتب  
الكتاب..

خرجنا.. واتعشنا بره، عملت كل حاجة نفسي أعملها  
معاها في يوم، كانت ماسكة دراعي كاني مهرب منها، أو  
كأنها مطمئة بيأ، ساعتها حسيت إن الحاجة لما بتيجي بعد  
تعب أو معاناة، بتكون طعمها حلو أوي؛ على أذ التعب  
اللي تعبته عشان توصل للحاجة دي.

يومها اتكلّمنا كبير أوي.. حكيت لها على جزء من  
الحقيقة، ويسبت الباقي تعرفه لوحدها، لما نقرأ الكلام



اللي كنت بكتبه ليها، لأن دي آخر ورقة في الكشكول،  
ويكتبها يوم كتب الكتاب بالليل، بعد ما روحت واليوم  
خلص.. عشان بكرة أديها الكشكول، وتعرف كل  
حاجة؛ من قبل البداية، لغاية النهاردة.. لغاية اليوم اللي  
حسيت فيه يعني إيه هي ليا سكن وبيت.

- شكر خاص جدًا لـ -

- لنفسي..

اللي دايماً ليّاً ضهر وسند.. وحضن وبيت .. اللي كل  
يوم بحبها أكثر من اليوم اللي قبله.. اللي واقفالي دايماً  
بالمرصاد؛ حُبّاً فيّاً وخوف عَليّاً.. اللي من يوم ما لقيتها  
وأنا أحسن من الأول بكثير.. اللي الوقت بيعددي جنبها  
ثواني، وبيعيد عنها سنين.. اللي دايماً جوّه قلبي .. وبين  
ضلوعي زَيّ طيري.. شكراً ليكي إنتي، عشان إنتي  
نفسي ♥

- (+ ٨٥ ألف متابع) الداعمين ليّاً دايماً، أنتم الفرحة  
والرزق والسند اللي ربنا أكرمني بيه..

يا رب الكتاب يعجبكم، وأكون عند حسن ظنكم..

وأكون قد برت أفدّم الفكرة دي بشكل خفيف  
وللبيد بدون تعقيد.. شكراً جداً لوجودكم ومحبتكم  
اللي مخلصاني مستمر ومكمل في طريقي.  
- أصدقائي القليلين جداً في العدد، والكبار جداً في  
المقام.. شكراً لوجودكم جنبي من أول الطريق  
لغاية دلوقتي.. تعبتكم معايا واستحملتم كثير أوي.  
- دار نشر (الرسم بالكلمات).. نشرت معاكم أول  
عملين ليّا (مَالِك - برّه الدنيا).. شكراً على كل  
حاجة، ورينا يديم الخير والاحترام المتبادل بيننا،  
يارب.  
- أعضاء جروب عصير الكتب، أصحاب الفضل في  
تسيهي إني ممكن في يوم أكتب.

## الفهرس

١١	قرار
٢١	رَدَّ فعل
٣٥	الفِرْيَك
٤٧	صِدْقَة
٥٩	مرحلة الإقناع
٧١	ما قبل البداية
٨٣	سُخْرِيَّة القَدَر
٩٥	يوم الامتحان
٩٥	يُكْرَمُ المرءُ أو يُمَان!
١٠٧	النتيجة!
١١٥	قَبْل الحَطُوبَة يوم

- ١٢٥ ..... يوم الخطوبة
- ١٣٧ ..... يا فرحة تمت في أغرب
- ١٣٧ ..... مكان في العالم
- ١٤٧ ..... ضوابط
- ١٥٥ ..... حُب مش تعود
- ١٦٣ ..... يوم كتب الكتاب

للتواصل مع الكاتب :

الحساب الشخصي:

romance.mahmoud

الصفحة الرسمية:

mahmoud.bakry2016